

愛是恆久忍耐

作者: 可有可無的人

Powered by [紙言](#)

序章

序言:

愛到底是什麼樣的感情,需要做什麼來維持?答案每一個人都會不同。

雖然我不是一個教徒,但這一個故事是從聖經金句開始。

廢話不多說,故事現在開始。

序章

“愛是恆久忍耐，又有恩慈，愛是不嫉妒，愛是不自誇，不張狂，不做害羞的事，不求自己的益處，不輕易發怒，不計算人的惡，不喜歡不義，只喜歡真理；凡事包容，凡事相信，凡事盼望，凡事忍耐。愛是永不止息。” 哥多林前書13：5-8

「

這一段聖經金句,下星期需要背默,如果不合格的同學,需要留堂罰抄30次。」宗教科的李老師於黑板上寫完金句後對全班同學說。

宗教堂對於我們男同學來說,是漫畫書交流活動的課堂,因為公開試中宗教科不是必修科,因此這一科的老師只要不吵鬧,通常會放任我們做任何事情。

和大家介紹一下,我叫蔣富榮,中一的時候,老師強制性要求我們改英文名,當時大家改的英文名,通常是David, Mary, Michael, Sam這些教課書上的英文名。當時的我在詞典中找英文名,找了很久才決定叫Full,因為和我中文字的富字同樣的發音。

中四因為搬屋的關係,所以我轉了新學校,幸好中四選科的關係,有很多同學之前不是讀同一班,反而沒有小圈子的情況出現。

「喂~阿Full,放學在七仔足球場等,我們還差一個人。」坐我後面的阿康搭著我膊頭和我說。

嗯,一間學校中,總會有一個極受女生歡迎,運動好勁靚仔的男同學,阿康就是所指既呢種人。

「我到時候要打什麼位置?」

「守門員,我覺得這一個位置你是最適當的人選,除了你沒有其他更好的人選。」

「和你同隊,還是不同隊?如果同隊的話,不用預我了。」

「當然是同隊啦,守門員位置有你在,我可以放心上前進攻。為什麼不和我同一隊踢波?」

「太悶了,對方連射門的機會都沒有,跟本不用守門員。你找其他人當守門員吧!」

「到時候會有很多女生,真的不來嗎?」阿康希望用女生來引誘我,但是對於我來說,完全動搖不了我的決定。

「“打咩”，唔洗預我。」我一面雙手打交叉，一面和他說。

「我介紹女生俾你，真的不來？」

「你收皮啦，女生們是睇你踢波，你介紹俾我有咩用！」說完我沒有再理會阿康，繼續睇我手上的漫畫。

第一章

第一章

千辛萬苦終於等到放學,對於我這一種沒有參加課外活動的學生,當然揹起書包頭也不回離開學校範圍。

雖然剛剛踏入10月,但溫度依舊未有下降,對於我這種怕熱的人,最佳的消暑方法,就是去圖書館看書直到太陽下山。

踏進電梯,正當電梯門完全關上的時候,一隻手阻止了電梯門關上,電梯門打開,有一個不停喘氣的短髮女生不停按著電梯按鈕,好似怕電梯門再度關上的樣子。

未等電梯門完全開啟,短髮女生一個箭步衝進電梯之中。撲鼻而來的是清淡之中帶有少許甜甜的香氣。

現在這一刻,才算是真正能夠觀察這位少女。留有一頭短髮,再加上一副方框眼鏡,雖然戴眼鏡,但是女生雙眼十分有神。因為劇烈運動導致雙頰泛紅,這一個女生的評分,絕對能夠得到90分以上。

好像察覺到我的視線,女生顯得有點不安。

為免給人誤會我是色狼,我只好移開視線。但是直覺告訴我,這位女生已經直接將我視為色狼。

如果電梯突然出現一個洞口的話,我會二話不說直接躲進這一個洞口。可惜的是現實的電梯不會出現這個洞口,我只能夠冀望電梯能夠快點到達圖書館的樓層。

短短半分鐘的等候,我好像過了大半個世紀。

沒想到剛才的女生,目的地都是圖書館。這下子慘了,她會不會出了電梯後,立即通知圖書館職員打電話報警拉我。我嚇到呆立在電梯前面。

當然這一切都只是我的幻想,我步出電梯後,想再一次再見到女生而四周尋找,可惜的是女生消失在我的視線之中。

當然我們還是有相遇的發展,只是之後再一次遇見女生時,已經是一年後的事。

第二章

第二章

雖然我的學習成績不算是太好,但是足夠我升上中五。而我和女生的相遇就是在中五的學年發生。

十月份的時候,班中來了一個插班生,取代了我們班中一個被趕出校門的學生。而她就是來代替的插班生。

正常的情況,班級內有人被趕出校門,是不會有學生來進行替補,而她的情況是比較特殊,所以學校也接受她的插班申請。

我記得當天有一個颱風迫近香港,天氣變得十分悶熱,在早會的時候,我還在努力地抄考著同學的功課時,班主任宣佈班上會有一個插班生的加入並介紹她及偏排她的座位。

從班主任的介紹中得知,她的名字叫何雅詩。感覺上是很有詩意的名字是嗎?我當時抽空抬起頭看了一下之後,就忘記了繼續去抄考功課。

當時候我只是覺得這位短頭髮女同學的樣子好像是在什麼時候見過,所以我不停在腦中回憶,但可惜的是我不論如何回憶,就是不記得在什麼時候見過面。所以我當時放棄了回想。

當時是十月份的關係,基本上班上的同學叫經全部分發好座位,本來她只能夠安排在離校同學的座位上。

剛好離校的同學的座位是在我的前方,所以順理成章的她被安排坐在我的前座。

「很高興能夠和大家做同學,我叫何雅詩,你們可以叫Ashley。」

「介紹完結,Ashley你先坐回你的座位,各位同學現在開始進行早會,要認識新同學的話,麻煩稍後再認識,不要阻礙早會的進行。」

早會是每日十分沉悶的一個過程,所以我繼續抄考著我的功課。

當班主任完成早會,離開課室後,我也完成了功課。

這個時候,有一些熱心的女同學走過來和Ashley聊天自我介紹一下。不過我因為比較毒的關係,所以我並沒有向她介紹自己。

放學的時候,如同之前的習慣,我還是去到圖書館無目的地逛一下才再回家。

我在圖書架前面尋找圖書的時候,沒有想到Ashley也會在放學後來到圖書館。她在我的肩膀篤了兩下,我轉過身後發現是她後一時沒有來得及反應。

「你好,我是你的同學仔Ashley,老師沒有點名加上今天你還未和我自介過,你叫什麼名字呢?」

「嗯....叫我阿Full就可以了。」我回答的同時,我感覺到我塊面好熱,我諗太緊張的關係,應該已經面都紅晒。

「唔洗緊張啫!我只係咁岩見到你所以想同你打個招呼。好少會有男生會去圖書館,你好喜歡睇書的嗎?」

雖然她叫我不緊張,但是對於從來沒有單獨和女生聊天的我,不緊張其實是很難的一件事。

「唔係呀!我只不過是不太喜歡打籃球踢足球這一些有益身心同埋需要體力的活動。」我呢一刻緊張到開始語無倫次。

「即係我可以理解做你很喜欢看書嗎?」

我並沒有回答,只是點了點頭。

「你喜歡什麼類型的書?小說還是其他類型的書?」

「並不一定只看小說類,只要我覺得書名有趣的話,我都會有興趣睇。不過小說類當中,我比較喜歡看衛斯理。」

「我都是比較有興趣睇小說,不過女生睇既一般都係愛情小說多。例如梁望峰,張愛玲既書。」

「男生和女生看書的種類不同吧!我未接觸過愛情小說,同埋應該不是我會睇的類型。如果俾人見到一個男生睇愛情小說,應該會俾其他人歧視。」

可能講到書係我能夠輕鬆應付得到的話題,我比起一開頭冇咁緊張了。

「話說你走未呀?我有少少肚餓,附近有冇小食可以醫下肚?」

「有一間我去開既小食檔.不過就要行返去學校附近,你會唔會去試下?」

「我冇所謂,呢個地區我人生路不熟,你帶路我跟你行就可以。」

第三章

第三章

因為放學時間已經過左好耐既關係,去到小食店的時候有很多座位可以選擇,為了避免油煙味,我選擇了離開廚房較遠的位置坐好。

「我返到屋企重要食晚飯,所以我齋飲唔食小食了。」

「我其實都需要回家吃飯,只是現在想食少少野,請問有沒有什麼推介既食品可以介紹俾我。」

「小食既話,我推介炸老蛋,配埋一杯聯合國就唔驚返到屋企食唔落飯。」

「聯合國同炸老蛋?個名咁特別同埋餐牌上面見唔到呢而樣野既?」Ashley拎起餐牌前前後後睇左兩三次都見唔到我推介的食物及飲品

「打機都有隱藏人物,你當呢個係隱藏既食品你點完佢就會整俾你。」

「ok,唔好食既話,呢餐你負責埋單。你要飲咩?」

「一杯大聯合國。」

「老闆麻煩落單。要兩杯大聯合國同埋十蚊炸老蛋唔該。」

在等小食既時候,因為諗唔到講咩野好既關係,所以我並沒有和Ashley講過野。

「你既兩杯大聯合國同炸老蛋。」老闆隨即將小食和兩杯汽水放低。

「其實點解呢杯野要叫做聯合國同埋兩杯野既顏色深淺唔同既?」

「名我就唔清楚貼解叫聯合國,不過就可以解釋貼解兩杯既顏色深淺不一樣。跟據老闆所講其實呢杯野係將唔同既汽水溝埋一齊,每一杯既汽水份量都唔係固定,所以可樂多一d或者少一d既情況下,都會令顏色唔一樣。」

「老闆親口同你講?」

「唔係。係朋友話我知既。」

「話時話,D炸老蛋真係炸到好鬼死老,同老伯伯塊面一樣。怪唔得叫老蛋啦。我叫左十蚊食唔晒,你幫下手食幾粒啦。」

「哦。」跟手我拈左一粒魚蛋來食。

「其實你係唔係唔太喜歡講野?」

關於呢個問題既答案,我係個一刻思考左好長既一段時間,我先答返佢。

「其實我唔係太識得講野同埋同人溝通。加上同女生溝通我也不知道應該談什麼樣的話題。」

「女生其實同普通人一樣,就好似我一樣,岩傾既咪有話題,唔岩傾既咪” 噃” ” 哦” 去回應返人。」

「你應該不是普通女生吧!應該冇女生願意同我溝通。」本來我想反駁返佢,但我並不够膽講出我既心底話。

「同異性溝通,你好似好有經驗。」心底話講唔出口,我經過深思熟慮後,決定這樣問返佢。

「通常男仔聊你既話都會有傾兩句啦!不過我好少主動搵男仔聊男仔的。快快手食埋個幾粒魚蛋,我差唔多要夠鐘返屋企啦!」

明明得個十粒魚蛋,正常人係一定會食得曬,真心唔明貼解女生總係會扮細食唔肯食埋去。

第四章

第四章

大家一定會以為故事發展係我同Ashley食完野,會去同一個車站,跟住搭同一班車返屋企。

Sor9ly,我開頭都有ff諗住係咁。不過現實還是歸返現,我最尾同佢唔同車站上車之餘,我連佢既手提電話都冇拎到。

因為未行近巴士站,Ashley的巴士已經準備埋站。

「唔同你傾啦,我架巴士就走啦!
byebye。」講完呢句之後,我都重未有機會講返byebye。佢已經一支箭跑上架巴士。

我目送Ashley架巴士離開既同一時間,原來我架巴士亦緊隨其後既同一時間開出左。

「頂!掛住睇走左班車。」

架車唔走都走左,冇辦法之下只有等下一班車,等車無聊唯有拎部手機出來篤一下消磨時間。

打開電話見到阿康既未接來電同埋whatsapp 訊息叫打返電話俾佢。我第一時間就打返電話俾阿康。

「喂!康哥搵我做咩野事呀?」

「我俾條女飛左,想搵你傾訴下係唔係唔得先?」

「老細,我有冇聽錯呀!從來都只有聽你飛條女,我又真係未見過你俾女飛過。」

「咩野料呀full少,我宜家俾女飛好唔開心,你重要串我。你一陣食完飯出來陪下我。」

「好難得情場浪子竟然有唔開心既一日,你講到咁我唯有捱下義氣陪下你。一陣8:00老地方等。」

「宜家6:00都未夠,反正你屋企都未煮你飯,你陪我出去食,最多餐飯我請你又點話。」

「好彩我未上車,你下次要約我早d講啦!我打個電話叫屋企人唔好煮飯。」

「頂!係你條pk仔冇聽我電話,你重好意思話我。岩岩做咩野事唔聽我電話呀。」

「我部電話又冇震又冇響到未冇聽到你個電話。大佬呀!我又唔係你條女,一定要聽你電話既咩!」

「好心你賣過部電話啦!好在我睇得開冇自殺,如果唔係我諗你會內疚死都似。」

「通常一個真係想自殺既人,係唔會想同人傾訴,你搵得我傾,即係你暫時冇自殺既需要啦!我唔同你傾住,我打左返屋企再搵你。」

「得啦!你條友真係好鬼死長氣。」講完之後阿康就cut左我線。我亦打返電話同我老媽子報到左先。

第五章

第五章

基於阿康係住得好近學校,有時我會放左學去佢屋企打機打通頂,所以我有一套替換用既便服放左佢屋企。

「喂!我同左老媽子講出街食啦!係唔係上左你屋企換左衫先出去呀!」

「係呀!上左我屋企再講。」連byebye都冇句阿康就已經收左我線。

「叮噹~叮噹~」

門鈴響左冇耐,阿康就開門俾我。睇住佢個樣,我好難想像得到平時溝死女既阿康,竟然會有頹廢到爆既一日。

「嘩!咩野事你個樣好似殘左咁多既。你幾時散左,做咩唔話我知呀!」

「唉!呢幾日我都不停諗方法同佢箍煲,一日未散我都唔會去通知其他人。」

「即係話你呢幾日都冇返過學呀?你又話一日未散一日都唔會通知其他人,但係你宜家又要我同你傾訴既?」

「佢今日將我個電話black list左,所以我決定放棄呢段感情。」

「你同佢散其實係咩野原因攞成咁?」

「唔散都散左,醫左個肚我再慢慢話你知。任食火鍋岩唔岩?」

「反正你請我食,食咩野當然係老闆話事。不過你俾我換左衫先落去得唔得。」我說完之後,阿康第一時間就拎左套衫俾我換。

「你呢?你唔諗住換衫呀?」我換完衫之後發現阿康拎好所有野開定埋門等緊我。

「雖然我個樣頹,同冇返幾日學。但係我每一日都有換衫沖涼。何況你又唔係女,我著緊個件又唔係校服,唔洗換衫咁麻煩啦。」

「個頭你真係唔梳一梳先出門口?」

「唔洗啦!男人老狗咁鬼婆媽既你。再講既話我立即鎖你係屋等你走唔到。」

「得啦得啦!我唔講啦!鎖門啦你。」我一邊講一邊行出屋外。

第六章

第六章

我同阿康去左一間任食既火鍋店,開左位之後,阿康第一時間就去雪櫃拎枝左幾罐啤酒。

笠返頂頭盔同講一個小知識俾大家知先~雖然香港暫時未有法例規管未夠十歲人士飲酒,但任食既火鍋店,我眼見既就通常個雪櫃放係度任人拎,只要你唔係著住校服去拎酒,應該都唔係太過理你夠唔夠十八歲。不過當然未滿十八歲既朋友最好唔好飲酒。

(註:
香港只有“容許未滿十八歲的人士在領有酒牌的處所內飲用酒類飲品即觸犯法律”《應課稅品(酒類)規例》)

「其實因為咩野事你會俾女飛既?從來只有你飛女,邊有女會飛到你架。」

「你岩呀!不過呢一次我竟然衰係第三者既手上,我覺得係一個恥辱。」

「竟然有男仔能夠威脅到你既男神地位重要搶埋你條女咁勁。」

「女呢家野,俾條仔搶左我又唔覺得係咩野恥辱,之但係搶我條女既係個lesbian。」

「竟然係俾lesbian搶走左條女。你有冇條女張相可以俾我睇下?」

「冇。我都想見識一下到底我係輸左係咩野女人手上。」

「你相又未睇過,樣又未見過,你點知條女有第三者,重要係個lesbian?」

「我既綫人話俾我知。如果唔係佢,我重俾條女呃左以為佢真係臨近考試要溫書唔得閒理我。」

「你綫人既料可信性有幾多先?」

「100%可信。」

「咁你之後諗住點做?」

「電視劇都經常有人講“正所謂天涯何處無芳草,唔好為左一棵樹放棄一整個森林。”出面大把女等緊我去溝,佢想跟過lesbian既話就俾佢跟飽佢。」開始到宜家,阿康其實只不過係飲左兩罐啤酒,但我發覺佢已經開始亂發喻風。

「其實正常來講,呢兩句應該唔會同一時間講。你條友仔平時唔係話唔睇婆媽電視劇既咩?做咩突然間講呢d老土對白呀!」雖然明知佢發喻風,但我真係忍唔住要同佢解釋一下。

「是但啦!我理得佢一句定係兩句話,你明就得啦!
話時話呢度可以俾你飲酒,你做乜唔陪我飲啤酒走去飲百事可樂。」

「唔係我想飲百事可樂,你估我唔想飲可口可樂咩。個問題係呢度得百事可樂飲咋。」同醉左既人係

溝通唔到,所以我決定左佢講咩野我都亂噏來回應返佢。

「妖!宜家講你唔陪我飲酒,你講乜鬼野百事可樂呀。」

「都未開始打邊爐你就飲左兩罐,一陣你醉左要嘔我唔會理你。」

「你識咩野,啤酒係鬼佬涼茶,打邊爐熱氣呀!你都拎啤酒來飲啦。」

「我一陣會拎真正既涼茶飲,
所以我唔會驚熱氣。另外,為免你一陣飲醉左,個銀包俾人偷左,我幫你保管住你個銀包先。」口就話驚
佢俾人偷銀包,其實我比較驚佢一陣醉左俾唔到錢。

「OK!銀包俾你,你幫我好好袋住佢。」

第七章

第七章

任食的90分鐘時間好快就過,阿康到最後飲啤酒並沒有醉到要我搬佢返屋企。不過他就曾經嘔過兩次。為免佢返屋企中途仆街,所以我好心地送埋佢返屋企,順便拎返套自己套校服。

結果我返到屋企差唔多11點。功課完全沒有機會做,所以最後我決定明天回到學校問人借功課抄考。

因為我屋

企同學校有一段路程,為免遲到,我通常都會係第一個返到課室既人,同埋我享受一個沒有人的寧靜時光。

打開課室既門,我發靚Ashley早就坐左係我前面既座位,插住耳機在看書。看到我打開課室的門,她放低左手上既書。

「疑!估唔到你會咁早返到學校,重諗住可以靜靜地睇書。」

「你咪照睇書law,我唔會阻住你睇,不過聽住音樂又點樣可以靜到睇書。」

「我冇聽音樂呀,我聽個d叫white noise,可以有效幫助人集中同埋放鬆。我可以俾你聽一下。」Ashley說完之後,就拔走插在手機上的耳筒。

我只能夠聽到一些類似落雨既聲音,不過我就感受唔到有咩野集中同放鬆既效果。

「你慢慢聽,我有我既放鬆方法。你繼續睇書唔洗理我架」我放低書包,托著頭望向窗外發呆。

「你唔係應該問下我睇緊咩野書咩?」

「我冇興趣知道,你唔洗話俾我知。」難得有女生聊我講野,但係我真係對佢睇緊咩野書冇興趣,同埋我唔知點樣回應佢,所以就用我慣常既回應方法應付佢。

Ashley從來無諗到我會直接拒絕佢。佢只有無奈地繼續睇書。

第八章

第八章

時間慢慢咁過,其他既同學陸陸續續返到班房,第三個返到班房既同學,都好驚訝除左我返到課室之外,Ashley都已經回來。不過驚訝還驚訝,但見到她專心睇書,並沒有去騷擾她。

再過左一陣,我終於等到提供功課抄考既Jim同學仔返來。

「Jim哥可唔可以借功課俾我抄下。」

「拎去,唔好抄到十足十呀!重有月底記得欠我餐飯要找呀!」

「得啦!又唔係第一次,洗唔洗每一次都提醒我呀!同埋我幾時有走過你大哥數先。」

「因為我覺得你會照抄。所以我特別提醒你。」

「抄左成個學期都有事啦!好心你就唔好咁婆媽得唔得。」

距離交功課既早會時間重有不足十分鐘,又係時候施展我既狂草Copy大法。

「乜你d字咁肉酸既。」當我抄功課既時候,Ashley放低左手上本書,望住我份功課。

「呢d叫做狂草,你唔識中文書法我唔會怪你。」我回覆既同時間,手並沒有停慢落來,經過長時間既訓練,我早就練成左一心二用。下一個階段我想做到左右手同時抄兩份唔同既功課。

「咩野年代呀宜家,書法一早就淘汰好耐啦。」

「淘唔淘汰冇咩所謂,最重要係快。」今日進度唔錯,我在上堂既鐘聲響起之前成功完成所有既功課。

「你地兩個之前就已經認識嗎?」阿Jim見到我地鬥咀既情況,所以忍唔住問。

「我只係搭訕,大家前後座位傾傾下就認識啦!我都同你有傾啦,唔通我之前又認識你咩?」Ashley搶先一步答左呢個問題。

「難得見到阿Full會同女仔講野,我還以為你們兩個一早認識。」

「多事啦你個口水佬。再講信唔信我撕爛你份功課。」我作狀撕開Jim的功課。

「唔好撕爛呀!我係全班從來未欠過功課既唯一一人,我唔想呢個記錄終結呀。」

「我攞掂左份功課,我先唔會真係撕爛佢。」

在班主任上早會堂前一刻我成功完成所有功課。

第九章

第九章

辛辛苦苦終於捱到臨放學的最後30分鐘。我放在褲袋既電話微微震動,偷偷拿出電話,發現阿康的短訊。

其實好多人會覺得奇怪,阿康之前唔係話坐係我的後面的嗎?其實阿康同我只係做左幾個月的同班同學。當時佢覺得理科並不是他喜歡的科目,所以就轉讀文科(最主要原因我覺得是文科生女生比較多。

其實我同樣並不是理科的材料,有一刻曾經諗過緊阿康一齊轉課,但係屋企人一句讀文科冇出路,所以我先繼續理科。

好似越講越遠,入返正題講返阿康既短訊先。

「我諗通左,Karen雖然我係唔捨得,但我覺得下一條女會更加好,為左我既幸福著想。所以我星期六攞左個唱K活動,我預埋你一份。」

為左幸福著想同埋唱k活動,我真係諗唔到點解兩者會有關係。但係通常阿康攞活動一定會安排到女仔出現,只不過我能唔能夠認識又係另一回事了。

「預埋我一份,去邊間同埋時間你confirm左之後話我知。」

「已經confirm左啦,星期六2:00旺角火車站等。」

「到時見,話說你幾時再返學校上堂。」

「明天先返,情傷呢家野需要用比較長時間來平伏。」

「唔同你傾住,準備放學要執好個書包準時走。」

「執咩鬼野書包,你學下我咁,將d書放係學校啦!反正唔會有人會偷。」

「你理得我。」覆完之後我放返落褲袋準備放學。

之前借落既圖書今日到期,所以我放學之後,我又再一次去到公共圖書館。

剛好Ashley今日又係去圖書館。只不過我一放學就離開學校,佢就hea左一陣先去。所以我同佢只係在圖書館撞到,並唔係放學約埋去圖書館。

第十章

第十章

「疑!今日你又過嚟圖書館睇書呀!」Ashley 向著正在排隊等還書嘅我問起。

「唔係呀,本書到期所以我個來還書。還完書我就會走㗎喇。」

「我又係要去還書呀!咁橋嘅!」

「但我見你今朝早好似先開始睇緊本書,你咁快睇完啦!」

「我其實睇書嘅速度好快,加上我今日又偷偷上堂既時候去睇。」

「你睇乜嘢書睇到咁吸引,攞到你上堂都要去睇?」

「我睇女仔最鍾意睇嘅愛情小說,不過就算講個書名俾你,你都唔知係邊個啦!」

「下一個到我還書,我唔同你傾喇!」

「我排喺你後面,不如你等埋我,我哋還完書一齊走啦!」

「哦!」

就係咁結果我等埋佢一齊還完圖書,跟住一齊離開。

「其實你睇一本書大概需要幾耐時間㗎?」

「

其實我睇書嘅速度有快有慢,最快嘅話可以一日睇完本書,慢嘅話我可以試過續借咗幾次先睇得曬本書。其實最重要係,睇下本書對於我嚟講有冇興趣嘅啫!」

「如果你係按照興趣來決定本書睇嘅速度,咁做乜你會睇一本你冇興趣嘅書?」

「其實有陣時我係俾本書既書名吸引到,但借左返去先知道,其實嗰本書一啲都唔好睇!」

「你選圖書嘅方法都幾特別㗎喎!我從來唔會第一時間睇書名。」

「其實都唔係㗎,用書名嚟做選擇嘅話其實都幾好㗎!當一本書連個書名都唔吸引你,你仲點會去睇先。」

「你咁講又好似有啲道理喎!」

「咁我想知道返,你究竟點樣去選擇一本圖書啱唔啱你睇?」

「我同你唔同我首先我會睇睇本書嘅封面,第二件事我就會去睇書最尾一頁。」

「點解要睇最後一頁。」

「

最主要係因為我個人比較心急,所以想第一時間就知道個結局內容,同埋最後一頁埋尾可以睇到個作者究竟寫得好唔好。如果個作者埋尾係差嘅話,好睇極都有限。」

「呢個方法係好,但係圖書館既書,你點先可以睇到本書嘅封面係點樣。」

「

通常呢個方法只係限於圖書館有新書放出嚟。其他時間,我通常都會睇番嗰幾個我特別鍾意嘅作者先。」

「完全明白曬,估唔到你揀書會有咁特別嘅方法。」

一路傾一路行,我同佢一齊已經行到搭車嘅地方。

第十一章

第十一章

「我仲未有你聯絡方法,你可唔可以畀個電話我,我得閒可以同你whatapp傾偈。」

和Ashley等車既其間,我鼓起左最大勇氣,去問佢攞左電話。

「你話畀我聽你個電話號碼係幾多號,我打電話畀你咪得囉！」

我之後畀咗個我手提電話號碼,佢跟手打咗個電話畀我。

「喂喂!麻煩你阿full先生呀!」

「喂,我係呀!請問你係邊個呀」

明明我就企在佢面前,但係我哋兩個人重係好白痴拎住個電話來傾偈。

「

呢度係圖書館打電話過嚟,想通知返你本書過咗期好耐你都未還,如果你再唔還書嘅話就會畀人罰款。

」

「

我可以好肯定有冇話畀你聽,你係假扮緊圖書館職員,因為正常圖書館唔會因為未還書所以打電話畀讀者。」

「點解圖書館唔打得電話畀人呀!」

「

你試下諗一諗,你一日唔還圖書,圖書館一直會增加罰款,佢又點會提前通知你要去還書先!」我一面講一面做柯南“真相只有一個”既招牌姿勢。

「低b仔。」Ashley講完之後,cut左我線同埋不停笑。

我份人其實冇乜咩嘢,當可以令到眼前既女仔笑,我自己做一下小丑又有乜所謂。

「睇你個樣,我估唔到你平時唔太出聲咁cool,但你又夠膽可以做一啲好低b嘅動作。」

「平時我需要顧及我嘅形象,所以我唔會做呢d低b動作。」

「你又唔係明星,你又唔係偶像,你又咩野嘅形象可言呀!」Ashley 一面反白眼,一面對住我講。

「我只不過係想做出一個人畜無害嘅平凡學生形象。」

「做咩要做呢個咁嘅形象出嚟?」

「只要做出人畜無害嘅形象,咁其他人就會覺得對你冇乜攻擊力無乜影響力,唔會去搵你麻煩。」

「有咩麻煩會搵你,我唔係好明啲!」

「你試下諗下啦!當你一個人係好受注目嘅情況
當其他同學需要人幫手嘅時候,佢哋會第一時間諗起你,呢啲就係我所講嘅麻煩!
我個人唔鍾意付出同收穫唔成正比嘅事!冇咩數既野我係唔會做。」

「原來係咁,但係我覺得幫下手,又唔係啲咩嘢特別要付出好多嘅一回事。」

「你可能講得啱嘅,但我個人天生比較懶,所以唔好叫我做多餘嘅事。」

「
可能每一個人諗嘅諗法都唔同,有時候可以幫得到既咪幫囉,有時啲嘢人哋叫你幫手又唔係老馮一定要
做既。」

「
你架巴士到啦!唔講咁多啦,你上車先啦!」剛好巴士嚟到可以幫我解到圍,如果唔係我都唔知點樣答佢
好。」

第十二章

第十二章

我搭車返屋企嘅途中,我回想起來對於Ashley上車前所講嘅說話,我諗緊我會唔會令佢覺得,我係一個好自私嘅人呢?之不過講出嚟嘅說話,就好似潑出去既水一樣,唔係你想收就收得返。

「hi,我係Ashley」返到屋企我睇到佢send畀我嘅message。我隔咗好耐都唔知點樣回覆佢好。

「Hello,我準備瞓喇晚安!」諗左好長既時間,由返到屋企,食完飯沖完涼,到臨瞓覺之前,我先諗到呢一段message。

其實有一刻,我曾經有諗過搵阿康,去問佢究竟應該點樣去回覆。但係我覺得佢唔會正經咁樣回覆我,所以我放棄搵佢尋求協助。

「你咁遲先回覆嘅,我啱啱先做完功課,我都差唔多準備瞓喇。早抖。」

當晚我其實諗咗好耐好耐,覺得為咗維持我同佢嘅友情關係,我覺得暫時保持一個適當距離適,在呢個時刻係有必要維持一個安全既距離。

大家可能覺得,你哋宜家只不過係普通既同學關係,連朋友都未算嘅時候,講咩嘢維持友情嘅關係。

但係我想講畀你知,係呢個時間,我其實好驚講錯嘢,失去咗連朋友都做唔到嘅情況。為免到咗真正失去既時候會傷心,倒不如從來都唔去踏出改變關係嘅呢一步。

所以我下定咗決心,我唔會因為佢而刻意改變我現時對佢嘅態度。

對於我同Ashley既關係,我決定咗唔去理,見步行步就算。

第十三章

第十三章

拎完whatsapp嘅第二日我照常返學。不過放學嘅時候,我都會直接返屋企,冇再去到圖書館。雖然在課室嘅時候佢會偶爾同我傾偈,但我怕會在圖書館撞到Ashley,因為我覺得佢在圖書館同我傾偈嘅時候,我對佢嘅態度會好唔一樣。

時間話咁快就去到星期六,我決定好好咁去玩唔再理心煩嘅問題。

本人係一個十分重視時間嘅人,所以未到2:00,我已經到咗旺角火車站。

其實我真係好驚旺角區,一到星期六條街就會人頭湧湧。

同埋就算你迴避技巧有幾好,總會有啲仆街大陸人,佢嘅行走路線只有一條直路,就算你係佢條直路面前,佢都唔會理你會撞開你先。

「阿康,你喺咩位置呀!兩點都嚟緊啦!你幾時到呀?」

「大佬呀!你都識講啦,而家兩點都未到,我啱啱到咗九龍塘站喇!好快就到,你耐心d等下啦!」

「你約個班女仔,我一個都唔識,你叫我點樣認人呀,到時啲啲女仔搵唔到你,之後走咗未麻煩。」

「你啲啲咩邏輯嚟㗎?你試諗下當個女仔搭車出嚟,佢需要付出時間同埋金錢搭車出嚟,你覺得佢會唔會因為等咗一陣唔見我而走咗去先?個答案係唔會呀!因為唔等埋我呢件事上面,根本上唔合乎經濟利益。」

「我唔理你咩經濟效益呀!麻煩你快啲到咗唔該。」

「okok。你等多陣我好快就到。」

阿康到咗之後其他三個女生,陸陸續續都到咗。三個女仔到齊之後,阿康逐個逐個介紹。

講返三個女仔,分別叫Amy,Kelly同埋Bonnie。

Amy屬於文靜嘅學生妹,Kelly屬於MK妹型,Bonnie就屬於運動型嘅女生。

三個女仔每一個人都有唔同嘅特點,有時候我真係唔明白,點解佢唔可以約到唔同類型嘅女仔出街。不過,我諗呢d就係佢嘅個人魅力。

第十四章

第十四章

星期六去唱k,其實我預計基本上都需要排好耐時間,但阿康原來一早已經book咗間房。

仲有樣嘢其實值得一提嘅,阿康其實屋企都叫有啲錢,雖然未至於去到一啲富豪嘅程度,但係佢點都會請班女仔去唱k食飯。

我諗大家都有同女仔去唱k嘅經驗,當女仔一去到k房第一時間就係,有你有你爭左個遙控,點曬所有歌,點到即最後一頁為止。

男生在k房嘅表現就等同於一隻大草原上既雄性嘅獅子,基本上佢哋係冇落場嘅機會,淨係得個睇字。我哋睇住女生爭奪遙控器,重要冇辦法接觸到個遙控。

基於我唔會搶到遙控器既關係,所以我基本上會從旁邊觀察,幾個女仔嘅行動。

Kelly一入到間k房,就第一時間拎住個遙控器。Amy就喺個手袋,拎出一包濕紙巾抹乾淨所有咪,同埋笠返個咪套。Bonnie見冇乜嘢可以做,就問我嘢咩飲同服務員落order。

基本上阿康同我兩個人,預咗冇份唱k嘅關係,所以我哋通常都會叫定幾個骰盅玩大話骰。

雖然我哋去唱k,拎骰盅玩大話骰,不過我哋叫唔到酒嘅關係,所以我哋會用另一個方法去代替酒作為懲罰。

我哋通常都會唱k前喺就近便利店,同啲女仔講每個人選擇一枝自己鍾意嘅非酒精飲品,但係會限制佢哋唔可以買水。

阿康會買奶,我就通常比較好心少少買檸檬茶。

其實遊戲嘅玩法好簡單,輸咗嗰位就要飲左杯嘢,而其他人就會提供岩岩買既嘢飲倒落個杯度,分量當然唔會話一個杯只有一種飲品啦,阿康通常會拎埋一個量杯去唱k。(好耐之前佢為咗玩呢個懲罰遊戲,真係去左買一個實驗室專用嘅量杯)各位贏咗嘅玩家,需要再擲一粒骰,按照擲骰嘅結果,倒有關份量既飲品落量杯。

其實普通通溝飲品其實係冇乜嘢嘢嘅,但係衰就衰在阿康永遠都會買一支奶,試過有一次女生買左枝蘋果醋,兩樣野溝埋一齊就出事啦。攪勻左之後杯野有一d類似沉澱物既野出現。(我其實有問過google大神,睇到網上有人教牛奶加醋再加熱之後,可以加工做成芝士,我唔知同我見到一粒粒既沉澱物有冇關係。)

第十五章

第十五章

一切已經準備好,我哋開始進行呢個大話骰遊戲。

如果係兩男兩女嘅情況下,阿康通常都會同其中一個女仔做拍檔。

當女生比例較多嘅時候,阿康就會同我一齊做拍檔。
讓所有女生都同一隊,令到個形勢睇落去好似公平一啲。

其實呢個世界並無公平啲兩隻字,我同阿康合其實一早已經set好左一啲暗號會對自己有利。

我哋嘅策略,就係頭兩局我同阿康都會輪流輸掉,令到所有女生都放低戒心。(一開始同阿康合作,本來諗住用四局的,但後尾發現唔對路,我同阿康協議,只要佢買牛奶嘅話,我最多只會陪佢輸兩局。)

玩到咁上下,
我就會同阿康兩個人用暗號嚟溝通。(其實暗號並唔係好複雜,只係在叫骰既時候,拍打幾多下個骰盅,代表我呢個數到底有幾多粒骰。)

雖然有暗號嘅幫助,但我哋唔能夠做到100%贏得到,只不過係令到輸既機率減低。

今日mk妹Kelly一直唱歌既關係,所以只有我哋同 Amy和Bonnie四個一直玩。

我諗唱咗大概半個鐘頭左右,Kelly
開始唔夠氣再唱落去,我哋既大話骰又玩到咁上下。各人開始輪流選歌再插播。(Kelly點既歌偏向冷門少少既日文歌,所以冇人同佢一齊唱,係中間有啲大路既廣東歌,另外兩個女仔先有機會拎枝咪去唱兩句。)

正當我可以拎住個遙控器點歌嘅時候,我褲袋嘅電話突然間震咗兩下。

「Hello,你做緊咩呀？」Ashley用whatapp發訊息俾我。

「我同啲同學唱緊k。」

「咁開心喺邊度唱k呀？」

「旺角。」

「我又係咁啱出到旺角喎,咁你唱k唱到幾多點呀？」

「其實我麻麻地唱k,所以我隨時都可以走得。」

「我都麻麻地唱k,如果你隨時可以走得嘅話畀我哋去行街買衫好唔好。」

面對Ashley既邀請,我有少少猶豫不決,到底答唔答應佢好。

阿康個死仔八卦睇到我既message, 就搶咗我個電話。

「ok,邊度等。」阿康好快手就發出左短訊。

「頂你個肺,死仔康我冇諗住應承佢出呀!」

「難得有女約你,你就走啦,呢度我應付得到,你冇唱過k,唔洗俾錢啦!你去尋找你既幸福啦!」
跟住條死仔打開k房度門,送左我出去。

第十六章

第十六章

「不如約係朗豪坊等。」Ashley 回覆咗message。

「ok冇問題,喺個樣衰雕像前面等。」

「先到先等啦咁!」

雖然我好憎人多嘅地方,但係我更憎等紅燈過馬路。所以我的行落去地鐵站再過去朗豪坊。

我本身諗住旺角中心同朗豪坊其實好近,應該會快過佢。點知上到地面,佢已經響個邊等緊。

「hello。」離遠見到我去,佢已經對我揮手。

眼前既Ashley,紅色格仔恤衫搭配一條黑色牛仔褲我覺得著得好型。

「乜你咁快到嘅,本身仲諗住需要等你添。」

「hehe, 我whatsapp個時,其實係附近啦,你唔會快過我。」

「得喇得喇知你叻喇! 你諗住行咩嘢鋪頭先呀?」

「冇所謂呀,搭咗電梯上最頂層再慢慢行落嚟擺!」

「要搭個條電梯呀?」因為本人畏高嘅關係,每一次去朗豪坊我都好驚同避免去搭呢個咁長既電梯。

「係呀,呢個係最快嘅方法,我唔想等lift呀!」

雖然搭電梯係會驚,但只要唔好望返落下面,我諗都應該冇乜咩問題。

不過好多時你諗唔代表事實係一樣。到真正我搭電梯嘅時候,全程都緊扼住個扶手。所以當Ashley同我講任何嘢,我都其實係聽唔入耳同俾唔到反應。

離開咗電梯嘅一刻,我隻手鬆開嘅同時,電梯扶手印有一個好濕嘅手印。

「睇你個樣嘢好似好驚搭電梯喎。」

「呢條電梯又長,左右兩邊都冇嘢旁住,你唔覺得好恐怖嘅咩?」

「

我又冇畏高,我真係唔覺得囉,不過你又誇張左啲啲咁多,我見你手汗好勁下。嚟!拎張Tempo去抹手。」

」

「唉!你唔明我嘅心情㗎啦。拿拿林搭埋個下半場佢啦!」我一面抹手一面向上頂樓既扶手電梯行。

第十七章

第十七章

上到最頂樓,我終於鬆咗一啖氣。漫長嘅電梯地獄終於完結。

講真嗰一句,我其實對於女裝係冇研究,搵我嚟揀衫,其實都冇乜咩意見可以俾得到。再加佢要揀嘅衫,其實係呢個名店林立嘅商場,我覺得好難搵得到岩佢心水嘅衫。

所以最後我同佢基本上行得最耐嘅商舖,係變左無印良品。易買嘅嘢亦由衫,變左做文具零食。

「我行到好叻喇!你仲有冇咩其他嘢想睇呀?」Ashley基本上將一袋二袋都交由我拎,但佢口中講叻,真係幾唔make sense。

「我好少行商場,但埋我冇乜嘢想睇啦!」我覺得最重要,其實我真係好想離開呢個好多人好迫嘅商場。

「而家五點鐘都未到,有冇興趣去cafe嗰邊hea下。」

「只要離開呢個咁嘅地獄,去邊度都冇所謂。你想玩board game,定係話想睇漫畫書。」

「靜靜地睇下漫畫書算啦,我唔想玩咩board game。」

「ok,咁你跟我行,我帶你去睇漫畫嘅cafe啦。」

第十八章

第十八章

最後我帶咗佢去金雞廣場一間cafe。

「你好。麻煩你兩個人咁唔該！」我同cafe嘅侍應講。

「

呢個moment我哋暫時未有好多客,梳化位你哋可以隨便坐,但係之後如果人客多嘅話,可能需要轉普通嘅枱,唔知你哋有冇問題？」

「我問題,唔該囉。」

「你想坐梳化位定係普通枱？」

「我想坐得舒服啲,我覺得坐梳化好似好啲。」

「你哋坐咗埋位先啦!我哋一陣會畀個menu你哋點野。」

我地揀好咗座位之後,Ashley已經急不及待走去睇下有咩漫畫書。
而我就幫手睇住佢岩岩買返來既戰利品。

侍應放低左份menu之後,我見Ashley選擇左好一段時間,佢擺咗返嚟嘅漫畫書叫“華麗咖喱食桌”,我見到佢拎返嚟既期數係一至十期。

「我雖然知道你睇書睇得快,睇落你諗住睇完先走？」

「十本其實唔多,好快就睇曬㗎啦。你諗好左叫咩野未呀。」

「本身我諗住就咁飲杯嘢hea一陣就算,但我睇見你咁樣,應該都係諗住長期作戰㗎喇,係唔係諗住食埋晚飯先走呀？」

「都好啱,咁不如食埋晚飯先走啦!」

「

不過我而家唔太肚餓,不如我問下佢,可唔可以遲少少先叫嘢飲,同埋叫嘢食。」跟住我叫咗個侍應過嚟,佢話可以幫我落咗單先,之後想食既時候先再整俾我哋。

「我要一個A餐,跟餐要一壺花茶。花茶麻煩你宜家俾左我先。」Ashley第一時間諗好落埋單。

「咁我要一個b餐同埋一杯cappuccino。
我唔使要杯嘢住,一陣間跟餐先畀我」侍應跟手就幫我哋落咗單先。

「而家到我去揀書,你幫我睇住啲嘢得唔得。」

「冇問題呀。」

第十九章

第十九章

我行咗出去揀左幾本書之後就返返埋位坐。

我諗我出去短短十分鐘左右嘅時間,我見到佢已經睇緊第二期。

「你好鍾意睇一啲煮食類型嘅漫畫?」

「少少咁啦,但係最主要其實係,因為我睇到佢有華麗兩隻字,所以先會吸引我去睇。」

「呢本嘢會唔會有好似啲啲其他烹飪漫畫,好鬼誇張好鬼誇張,又有必殺技又有條龍飛出嚟㗎。」

「睇咗兩期都未見到有所講別情況㗎。我暫時睇算係一本好正經漫畫。」

「哦,你慢慢睇啦,我想問你叫咗個壺花茶好唔好飲?」

「普普通通咁啦,我只係搵唔到比花茶更想飲嘅嘢先點佢。」

傾左一陣偈之後,我再冇騷擾佢,兩個人靜靜地咁睇漫畫書。

當然我係睇漫畫書嘅同時,我又偷偷地望過佢。佢好專心咁樣睇緊本漫畫書既樣,令到我不自覺咁樣,好想再望多佢兩眼。

當佢睇完第六期嘅時候,佢突然間企左起身。

「我出去一陣間好快就會返嚟,麻煩你幫我睇住啲嘢呀唔該。」然後佢就行左出去間cafe。

對佢突然離開,我完全畀唔到任何反應。我再諗左一下,,既然佢所有嘅物品都喺我度,應該唔會走得好遠,同埋應該好快就會返嚟。

第二十章

第二十章

Ashley 離開咗大概20分鐘左右,佢用whatsapp send咗個message畀我。

「對唔住呀,我有緊要嘢要走先啦!今日我買嘅嘢,想寄存喺你屋企先,我要遲少少,先再搵你擺呀!」

「放我屋企?定係我逐少逐少咁樣擺返學校交界你呀?」

「唔好啦,我買咗都好多嘢,我遲少少再搵你擺返啦!我唔講住啦!拜拜。」

「咁好啦!拜拜。」

對於Ashley 走得咁急,我好難避免唔會諗埋一二邊。所以我立即send message畀阿康。

「康哥,如果一個女生,突然走得好急,所有嘢都唔拎到就走左,你知唔知底係咩嘢事?」

「

有兩個可能性,第一,係佢男朋友搵佢,所以佢驚起上嚟就唔想擺住咁多嘢俾佢懷疑。第二,佢真係有啲緊要事,或者有其他原因,令到佢唔想擺住啲嘢周圍行。」

「即係佢男朋友搵佢?」

「唔一定,我只係講出個可能性。同埋人哋就算有男朋友對你來講都係好事,因為可以睇清楚成件事,如果佢真係想搵你做兵嘅話,你可以盡早死咗條心!」

「我好似冇講過,話一定要同佢拍拖。」

「隨便你啦!我哋仲未走,你會唔會返過嚟一齊唱k呀?」

「我諗住返屋企算啦!我而家拎住好多嘢唔方便。你同班女仔玩得開心啲呀!」

我發覺我問咗之後,更加諗埋一二邊。本來諗住睇嘅漫畫書,宜家都有心情再睇落去。我拿拿聲飲完杯咖啡之後,就決定埋單走人。

第二十一章

第二十一章

搭完車返到屋企,放低手上面一袋二袋屬於Ashley嘅物品。

我坐咗喺梳化上,拎起手提電話,睇到最後上線嘅時間係佢打電話畀我之後。
我其實有衝動想whatsapp畀佢,但係我又唔知應該打咩好,同埋我驚阻住佢。

「你走得咁急,冇乜嘢事呀嘛!」

「你而家返到屋企未呀!」

「我好擔心你,可唔可以send返個message報平安!」

「你如果唔開心既話,可以同我講。同埋如果有咩需要,可以搵我幫手。」

「其實我鐘意你,你可唔可以做我女朋友。」

以上我想講嘅message,我全部都有打咗whatsapp上面,
只不過係臨send出去既時候,我全部delete曬。

你哋可能覺得我係冇膽,呢個我認。

作為一個從來未拍過拖嘅人,我唔清楚咁樣send出去,如果佢真係有男朋友嘅話,會唔會破壞咗我同佢宜家建立咗嘅關係,我好驚到時連佢都冇得傾。

「唉!只不過係send個message咁簡單,點解你會咁冇勇氣㗎!」

我喺心入面鬧緊自己冇鬼用。

但隔左一陣,諗深一層。當人哋真係有男朋友嘅話,我自己又憑啲咩嘢可以同人哋男朋友對比,我越諗個人就覺得越down。

第二十二章

第二十二章

好唔容易,終於到左星期一嘅朝早。如同之前嘅習慣,我第一個返到教室。
好期待Ashley係第二個返到嚟,咁樣我就可以有機會問佢,星期六究竟發生咗啲咩嘢事。

不過我嘅願望落空咗,佢不單止唔係第二個返到嚟學校嘅人,佢直頭連學都冇返到。

到底有咩嘢事令到佢唔返學,呢個問題纏擾咗一整日。

我望住前面空空如也嘅枱面,我突然好掛住佢,雖然只係分開左短短兩日,但我真係好懷念住佢講野嘅聲音,更加懷念佢撥頭髮時所產生淡淡既氣味。

我上堂嘅時候拎電話出嚟,佢WhatsApp最後嘅在線時間,依然係星期六,我想像唔到呢兩日究竟發生過咩事。

喺放小息嘅時候,我去咗搵阿康佢傾下呢件事。

「你可唔可以幫我分析一下,到底係咩原因令到最後在線時間會係兩日之前。」

「

有乜嘢好分析啫,一係佢個電話冇開到whatsapp,一係佢個電話就開唔到。其實分析完之後又可以點呢? 佢就算顯示左在線,你都唔會打電話畀佢或者send message畀佢㗎喇!」

「最起碼我想知道去安唔安全,同埋咩原因令到佢唔返學。」

「你連send message嘅勇氣都冇,唔好講你直接打電話問佢,喺呢個情況之下,你又點樣可以知道佢究竟發生咩嘢事?」

「我唔知應該send咩野message畀佢,所以咪send唔到出去囉!」

「你拎個電話畀我,我幫你send出去啦!你咪當關心朋友咁send一個關心嘅message咪得囉有幾難呀!」

阿康拎左我個電話揸咗一輪之後,就畀番個電話畀我。

「我好唔習慣冇咗你嘅課室,我等緊你返黎同我一齊上堂,希望你快啲好返啦!」我見到佢send咗呢一段既既message出去,我就知道呢次奶嘢啦。

「大佬呀,呢個點睇都唔似係關心佢啦,你係咪玩鳩我呀?」

「咁樣有乜嘢問題啫,我不嬲都係咁樣send去關心人㗎。」

「呢個係你關心人嘅方法,而唔係我關心人嘅方法。」

「又有咩所謂嗰,呢個message可以表達到你有幾關心佢。」

「呢次我真係俾你累死喇。」

「無嘢嘅,到時佢回覆你既時候,你就會知道我用心良苦㗎喇。」

「宜家都send出去啦,咁我可以點啫。」

「咪就係囉,唔send都send咗出去囉,咁你咪等下,睇下佢點樣覆返你囉。」

第二十三章

第二十三章

再次收到Ashley message已經係三日之後, 佢呢幾日都冇返過學校上堂。

「好多謝你關心我,但我宜家唔嚟香港呀,我返左大陸好快會返嚟㗎喇!
btw我收到嘅message感覺好似唔係你寫。」

「你返大陸做乜嘢呀？」我決定唔解釋其實係阿康幫我send段message出去

「祕密,我唔話你知。」

「咁你大約幾時會返嚟呀？」

「應該下星期初就會返到嚟香港。」

「再唔快d返嚟,你之前買落嗰啲零食我就會食囉佢。」

「啲零食又唔係貴嘢,你咪食囉佢囉,反正我擺咗咁耐 當做存倉費囉。」

「我講下笑咋,唔好當真啦。」

「冇得上網,我唔同你傾喇。拜拜!」

「拜拜。」

我真係好好奇佢返大陸究竟做咩嘢,但係呢個問題最好都係等佢返嚟香港先問啦。

第二十四章

第二十四章

好唔容易終於等到Ashley返到學校個日。

我一早返到學校,就見到佢坐係個位,佢一面聽歌一邊喺度睇小說。

「咁早返到呀!除左第二日返學你早過我,之後你都遲過我返課室。」

「太耐冇上堂啦,所以我想早啲返到嚟,坐喺課室靜靜地睇下書先。」

「我想問下你個日係突然間返大陸,定第二日先返咗大陸㗎?」

「我唔話畀你知。」

「懶神秘咁,你個日買嘅野你諗住幾時拎返呀。」

「我想今日放學去你屋企拎返,你得唔得?」

「唔係唔得既,但我屋企好亂㗎,你介唔介意先。」

「又唔係我屋企亂,所以唔介意啦。不過一陣我要還左書先走得,你要等一等我。」

「冇問題呀,我陪你去圖書館還完書再一齊走。」

其他同學陸續返到課室,返到嚟見到佢,大家都好關心同問候佢,但係佢一直都冇同大家講究竟呢個星期有咩野事發生。

一個星期冇返學,同時間代表佢一個星期嘅功課冇做到,老師需要佢補交返呢個星期既功課。所以我諗呢個星期佢都唔會得閒。

第二十五章

第二十五章

放咗學之後,我冇等埋Ashley,自己一個人走去左圖書館。

你可能覺得,既然佢都已經邀請左我去同佢一齊走,做咩仲要分開去圖書館。

我答你唔到點解要咁樣做,但係我唔想佢同我一齊去圖書館既時候,俾其他同學見到。

當我書準備要去借書嘅時候,電話震左一下。係Ashley send message畀我。

「我已經還左圖書啦,喺邊度等？」

「喺樓下lift口等,我要借書麻煩你等我一陣。」

「唔好麻煩啦,我過嚟搵你啦。」

隔咗一陣佢就過咗嚟等我,跟住我哋就準備搭巴士返去我屋企。

正常放學既時間,我呢一間巴士上面,都只會淨係得番啲企位畀你。

但今日有兩班車同時到站,其中一架係吉車,我哋理所當然上去呢一班有位坐嘅巴士上面。

我哋兩個人坐咗喺雙人座位上,我諗依家係我第一次同佢有咁近嘅身體接觸。

因為我同佢兩個人坐得好近嘅關係,我又聞到佢身上邊傳嚟嘅清淡類似棉花糖輕飄飄柔軟既香味。(你可能會話棉花糖柔軟唔係應該算觸感,又點會算係香氣。但係我話你聽,嗰一刻我真係聞完之後覺得,有一種軟綿綿同輕飄飄嘅感覺。)

正當我沉醉喺呢一個嗅覺嘅享受其間,佢突然間開口問左我一個問題。

第二十六章

第二十六章

「你有冇坐過熱狗呀？」

「吓？」對於呢個問題,我真係除左吓唔知點答好。

「我問你有冇坐過熱狗,即係問你有冇坐過飛冷氣嘅巴士呀！」

「我知熱狗係咩野,我係有坐過呀,但你問呢個問題係做咩事呀。」

「冇嘢呀,只不過眼見宜家街上面好似唔多見到有熱狗,所以先問。」

「你好鐘意坐？」

「係呀,我好鍾意坐㗎。」

「點解？」

「我好鍾意坐喺熱狗頭一行,開住個窗啲風迎面吹過嚟,我覺得好舒服,而家呢啲冷氣巴,坐頭位唔會有風嘅情況,我覺得好有壓迫感。」

「係咩?大熱天時如果要坐熱狗既話,我覺得好熱完全接受唔到。」

「我覺得冇乜所謂,同埋如果有風景想影相嘅話,我可以打開個窗,喺冇玻璃既情況就唔會有反光出現。」

「你好鐘意影相？」

「少少啦,人腦可以記憶既影像有限,影相就可以好輕易記錄你曾經見到既影像。」

「記低呢啲影像有咩作用？」

「好有用㗎,呢啲影像可以用嚟留低,成為你曾經生存過既證據。」Ashley講嘅時候用左手托住頭,然後望住窗外風景。

「你講嘢好似啲老人家。」

「錯啦,係世事都俾我看透了。」Ashley 擰返轉頭對我講。

「你又睇唔睇得透下個站就要落車呀!」

「膚淺!世事並唔係咁簡單,落車係唔係微觀,世事係宏觀。」

「我有興趣知你講嘅所謂宏觀同微觀嘅嘢,下個站要落車啦。」呢個時間我順手揪住座位附近既落車鐘準備落車。

第二十七章

第二十七章

我屋企同學校既距離其實好近,平時我勁唔鍾意返學放學例牌會塞車既情況,係呢個moment我最想佢塞車既時候,竟然十分暢順,所以我可以同Ashley平排坐既時間非常短暫。

返到屋企老媽子竟然唔喺屋企,所以間屋只係得我同Ashley兩個人。

雖然好耐之前廣告有話孤男寡女獨處一室,女仔實有損失,但係我真係冇膽向Ashley做出任何不當行為。(關於呢句對白,係一個蒸餾水廣告嚟嘅,大家有興趣可以搵下。)

本身Ashley應該拎完嘢就會走,點知佢臨走個一刻,俾佢見到我屋企一部W字頭遊戲機。

「你屋企原來買咗呢個遊戲機呀?我屋企人唔畀我打機㗎,你可唔可以開俾我玩下呀!」

「部機駁好咗㗎喇,你鍾意隨時可以玩得。你想玩咩game?一係你自己去揀下。」
講完之後拎咗一大疊嘅遊戲game出嚟等佢選擇。

「一個人玩好悶呀,有冇啲game可以畀我哋兩個人一齊玩㗎?」

「有呀,呢隻party game可以畀兩個人玩㗎。」我喺堆game入面抽左一隻party game出嚟。

「咁既然你介紹得就玩呢隻game啦!」Ashley仲未等開機就急不及待拎住個手制。

第二十八章

第二十八章

對於我呢啲體能差反應更差既人,呢隻game我之前只係同過阿康打同埋對電腦,我對阿康既戰績重要係玩十場輸足九場,我重要唔確認個一場係唔係阿康放水俾我。

對於Ashley呢種運動型既人,我打定左輸數俾佢炒,但結果係冇呢回事發生。

一開頭玩咗幾個mini game,佢一場都冇贏過。喺有主場之利,同埋練習訓練過嘅情況下,我唯有放一放水畀佢。

玩保齡球game嘅時候,我決定放水。因為保齡球呢個game係最容易放水,你可以好易控制個波碌落坑。

幾經辛苦之後Ashley終於可以贏到呢個game。(係每一關佢都出現落坑嘅情況,其實我要輸我覺得真係好難。)

「乜你咁屎㗎,連我未玩過都可以贏到你呀,你頭好好反省下啦!」

「你贏咗一場就巴巴閉閉,我之前幾鋪贏咗幾場我都未出聲。」

「你理得我啫,而家我贏咗我就有權利話你屎,不過時間唔早,我都係時候返屋企啦,你拎返啲嘢畀我呀!」

我喺間房嗰度拎返三袋嘢畀佢。

「我送埋你落去搭車,你拎住咁多嘢應該唔方便。」

「咁你幫我拎住是但一袋呀,其餘兩袋我自己拎返得㗎喇!」

跟住我同佢兩個人就落街等車,佢上咗車搵個位坐好之後,就隔住個車廂玻璃同我揮手bye bye。

第二十九章

第二十九章

第二日返到學校,我同Ashley又變返普通既同學有一重隔膜,同佢一齊打機既時候feel到同佢好close,就好似發夢一樣。

可能呢一個只不過係我自己幻想出嚟嘅感覺,佢亦都唔會對我有咩意思。

個一日因為我亂諗嘢嘅關係,我全日返學完全集中唔到精神。

「放咗學有咩搞呀？」我send咗個message畀阿康。

「我book左場同Bonnie去打羽毛球,咩野事呀。」

「冇嘢喇你玩得開心啲啦咁！」

「你同Ashley之間有問題,想要問我？」我突然覺得阿康好似我肚裡面條蟲,或者其實我最近來來去去都係問緊同一個問題,就係關於我同Ashley之間既野,問到佢條件反射得到呢個答案。

「係呀,女人有時真係好鬼死煩,完全唔知佢諗咩嘢。」

「其實你想要佢注意到你,你要識得點去拉近同埋同埋點樣去拉開同佢既關係。」

「你呢個講法好玄,我原全get唔到點去做。」

「時機到咗你自然會知道點樣做。」

「大佬你用個肺嚟講嘢呀,講啲嘢好廢。」

「

我又唔會同佢接觸,我點答到你應該點做。我講嘅嘢係咁多你自己慢慢參詳一下。我唔同你傾啦！」

呢一刻我終於明白咩嘢叫做「夏蟲不可語冰」,對阿康呢一個溝女等於呼吸一樣嘅人,佢身體反應,佢所講都好自然地帶領住佢,令佢知究竟應該點樣做去溝女。

但對於我呢啲所未同女仔表白同拍過拖嘅人士,我完全唔會理解應該點樣去做先好。

第三十章

第三十章

時間眨下眼就過到12月,宜家我同Ashley嘅關係都係依然照舊係一個普通既同學,幾個月嘅時間我同佢既關係,都冇再增進過一步。

不過我決定咗你用聖誕節呢個咁嘅節日,好好地計劃一下點俾一個驚喜俾佢。

不過俾驚喜佢之前,我都要確認一下,佢嗰日其實得唔得閒。所以係聖誕節前既一個星期,我試探一下佢既口風。

「係一諗起聖誕節假期有咁多假期,但又有咁多功課我就頭痛。」我send左個message俾Ashley。

「你都係返學校先抄功課㗎喇,有好多功課唔關你事既,你驚咩啫！」

「長假期嘅功課好難可以抄得切㗎,所以我點都會響聖誕嘅時候做下部份功課。」

「阿full先生,我有冇聽錯呀,你轉死性嗎？」

「你理得我啫,不過聖誕咁多日假期,你有冇咩嘢活動安排呀？」

.....對方正在輸入中。

等候回覆嘅時間,就好似等同死刑執行前既時間一樣。

「聖誕依啲日子緊係約咗friend去玩,不過我就約咗夜晚黑,朝早就未知有咩野攞。你問嚟做咩呀？」

「冇呀我嗰日仲未搵到friend出街hea,所以睇下你有冇時間啫。」

「你唔約阿康去出嚟玩？」

「個死仔聖誕節街緊係陪女㗎喇,點會約到佢呀!
我只不過都係順口問一問你得唔得閒啫,如果唔得嘅話就算啦！」

「我又冇話唔得嘅,不過我4:00就要搵朋友,所以聖誕節嗰日你都最後係一個人過。」

「冇問題啦,同埋個日夜晚個個一雙一對,我寧願留返屋企打機重好。」

「你ok既話,我冇問題可憐下你,等我呢個靚女陪你渡過半日嘅聖誕節。」

睇到佢應承既一刻,我立即彈左起身,我估唔到佢會抽到時間同我出來。

「個日10:00在尖沙咀碼頭等。」

「ok,到時你再提醒我一下。」

確認咗個日佢得閒既話,咁我係時候要安排一下節目先得。

第三十一章

第三十一章

其實所謂既安排節目,只有短短半日時間,好容易就能夠填滿囉。
宜家最重要既,其實有冇可能在呢短短幾個鐘頭內,製造到一個表白既機會。

我短時間內,諗左幾百種能夠表白既情境,但係我都在十分短時間內Ban囉。因為我知道我FF既情境應該冇可能會發生。

時間一日一日過去,但我所講既安排節目,一直都俾我既拖延症影響,完全係0進度。

結果,好快就到左12月24日當日。我因為想儘快見到Ashley,所以我9:00就到左尖沙咀碼頭。

我好記得個一日好凍,我就算著左一件長袖,一件冷衫,再加一件厚既外套同埋頸巾。碼頭吹過來既風又凍又濕,我就算點攞實件衫,d風都重係吹到入去我件衫,我等左30分鐘左右開始頂唔順,想行去室內搵個地方避下風。

雖然我有呢個諗法,但我最後都忍耐多20分鐘。到接近十點鐘嘅時候我已經兩行鼻水流曬出嚟。

所以我忍唔住去咗眼前最就腳嘅m記避風。

去到一個好溫暖嘅地方坐低,我就突然覺得好肚餓。呢個時候電話響起,係Ashley打現話俾我。
「早晨呀,full先生你起咗身未呀？」

「一早起咗啦!你當我咩野人呀!」

「我搭地鐵過嚟我仲有一個站就會到,你去到邊度位置?」

「我已經去到尖沙咀碼頭,所以你唔使驚要等我。」

「咁就好啦!我今朝早出門口嘅時候覺得好鬼凍,如果你要我吹住風等你嘅話,我真係會唔放過你。」

「得喇得喇!我等你得未呀,你到咗再打電話畀我啦!」

「ok,一陣見。」

第三十二章

第三十二章

買完兩杯熱咖啡,我在Ashley必經的十字路口位等佢既到來。

我看到在對面馬路紅綠燈位等待過馬路的Ashley,她今日十分罕有地穿了一條灰白相間的格仔裙。

除左校服裙之外,基本上佢出街通常都好少見到佢著裙。

我睇到太過忘形既關係,冇留意到紅燈就行出左馬路。

紅燈過馬路有咩後果,我諗你哋應該會知道,就係一定會俾車撞。

而唔好彩地我就正正俾部私家車撞到飛起。(話就話撞到飛起,但就當然唔會好似cctvb個d膠劇撞到飛開十幾米距離。)

俾車撞到個一刻,真真正正體驗到咩叫眼前一黑。我完全感受唔到任何既痛楚,就已經暈低左。

第三十三章

第三十三章

當我睜大眼嘅時候,我發覺眼前有一團強光射住我。

我諗緊呢團光,係咪就係臨死體驗所講既走馬燈。

當我對眼習慣左團光之後,我望向四周發現自己身處醫院,而唔係天堂。(我呢類無神論人士,就算死左,等緊我既都可能係地獄而唔係天堂。)

既然我未死,我第一時間就想檢視一下自己既傷勢。

睇電影同電視劇既時候,通常撞親車既演員,第一時間都會想抬起隻腳,之後發現自己撞完車之後,下半身癱瘓或者截左肢。

我醒返之後,都下意識去抬起隻腳,點知我真係抬唔起隻腳,其實唔止隻腳,我其他身體部分好似都抬唔起。

我第一時間心諗今次仆街啦,做乜撞一次車我竟然全身癱瘓。

正當我為咗下半生都要響張床上面度過,悲傷難過嘅時候。

我聽到Ashley把聲喺我耳邊響起。「你終於醒啦!」

「我訓左幾耐呀?」

跟手佢望一望病房入面個鐘,我又跟住佢睇一睇個鐘。

個鐘時間係11:00,出面個天重咁光,原來我暈左既時間只係一個鐘頭多少少。

「炒個車我都只係訓左一個鐘頭多少少,我身體都幾強壯。」我講完之後都覺得自己個Gag好爛。

「邊個同你講話你瞓咗一個鐘頭呀!你條死仔瞓咗一日啦!」

「一日?我約你十點宜家先得個11:00點會訓左一日呀!」我一邊講一邊心諗,估唔到Ashley都幾幽默講呢個笑話去呢我。

「宜家係12月25日既11:00,咁都唔係訓左一日?」

事情遠遠超出我既想像範圍,俾車撞一撞竟然暈左一日。

「所以你喺醫院等左我一日?」

「冇呀,撞你個司機報完警,救護車到場既時候,我同救護員講我喺你朋友,最後就跟埋救護車送完你入院,咁岩個時阿康打電話搵你,我接左你個電話同佢講你既情況,之後佢就叫左你屋企人過嚟醫院,跟住我在

醫院逗留一段時間就走左。」

「對唔住!我冇留意睇燈就衝左出馬路。」

「我都有受傷,講咩對唔住,不過醫生話你落地個下撞親個頭,所以照例要住院觀察兩三日先可以出院。」

「我個頭撞到但點解我好似全身都郁唔到?」我講完之後又再次嘗試郁動全身,但都係郁唔到。

「醫生冇講到有呢個情況,但我可以問問姑娘睇下佢會唔會解釋得到。」講完之後Ashley就轉個身行出去病房。

假如我真係真係全身都郁唔到既話,我都唔知應該點算好。

第三十四章

第三十四章

因為訓喺度極唔舒服,所以我就問護士可唔可以扶我起身,令到我可以坐直個人唔洗訓喺度同Ashley傾偈。

護士走咗之後Ashley就坐喺我張床側邊「放心啦,可能只係短暫性郁唔到,唔會一世都係咁。」

雖然佢咁樣安慰我,但我個腦個一刻空白一片,等醫生個一段時間,我就好似等緊宣布死刑既囚犯一樣。

醫生幫我檢查一下之後,就同我講需要再便一個詳細既檢查先可以確定到底係咩事。

於是就安排左我去做檢查,檢查結果出嚟既報告係一切正常,醫生到最後話再觀察一下同埋同其他醫生研究先可以知道原因。

老豆老媽子聽到之後,佢哋兩個既反應好唔同,老豆就好冷靜咁同我講叫我好好休息一下先。但老媽子一知道我唔郁得之後,就喊到收唔到制咁。好無奈之下,我只能夠安慰佢話唔一定有事既。

而阿康條死仔我諗住佢會在聖誕節呢個日子攞女happy緊,但估唔到佢竟然會過嚟探病。

「唔洗陪女咩?轉死性呀做咩走過嚟探我病都唔攞女呀!」

「兄弟入咗廠,我似重有心情攞女既人咩?女不嬲都可以再搵,但兄弟有事我一定係睇左兄弟先。」

面對阿康呢一番說話,如果唔係我郁唔到,我呢一刻一定會大大力咁攞住佢。當然呢一刻我能夠做到既就只有眼定定望住佢。

「我估唔到你竟然會拋棄班女選擇探我,唔知道既話重諗緊你係唔係中途轉gay。」雖然我宜家行動不便,但我把口同埋我個腦並沒有行動不便,為咗避免阿康擔心,所以我就用返平時既語氣串佢。

阿康聽到我咁講之後,捉住我完全無知覺既左手,然後用一個情深款款既眼神同我講。「阿Full其實從第一日返學個一刻,我就認定左你係我既終生伴侶,如果你好返之後你同我結婚好唔好。」

「咳咳!唔好意思阻到你兩個人談情,但探病時間就完,阿康你唔好阻住阿full休息啦!如果有咩要傾明天探病時間再講。」Ashley講完之後就同阿康兩個人離開左病房。

第三十五章

第三十五章

當胡鬧的傢夥離去,病房之中只淨低我同幾個病人,正當我以為一切歸於平靜的時候,喺我隔離病床既老伯撩我傾偈。

「後生仔,你女朋友都幾關心你啲,我見佢呢兩日一到咗探病時間就坐喺度等你醒返,重有心過我伯爺婆。第時好返記得要對佢呀！」

聽到阿伯咁講之後,我竟然有少少感動,但事實上我同Ashley重未表白,佢專登來探我有可能係因為我俾車撞既時候,係在我同佢約會期間。佢覺得係佢令到我受傷,所以就想知道我既情況,未必係佢對我有意思。

我係一個咁悲觀既人,萬一我真係餘生都會全身癱瘓,我到時候又可唔可以俾到幸福佢呢!當我一諗到咁,我就又覺得個人好鬼失落。

「阿伯你誤會啦!個女仔唔係我女朋友嚟,我同佢只不過係同學關係,加上我宜家咁既樣情況,其實同個廢人冇咩分別,我唔想連累到佢之後要照顧我呢個廢人。」我講出嚟同我心入面諗既係完全相反,雖然口講話唔想連累到人,但實際上我完全唔想佢因為咁樣而離開我。

「如果佢真係介意既話,就唔會日日過嚟搵你啦!佢有同你屋企人講話放心交俾佢照顧你。」

「阿伯你會唔會誇張咗少少呀!我唔太需要佢照顧,呢度又有醫生又有護士應該冇咩需要佢照顧既地方。」

「有醫生護士照顧你嘅地方只有醫院,你唔會無了期咁住醫院,你總會有出院既一日,你女朋友仔講既照顧其實係指之後既日子照顧你。」

之後既日子照顧我?我同佢非親非故,冇咩必要為左我呢個廢人去照顧我呢一生人,咁樣做真係值得咩?

隔離床老伯見到我有反應,可能以為我睇唔開,所以就勸我唔好諗咁多,宜家既醫療技術咁進步,一定會有好返既一日。

同老伯傾完之後,我一整個晚上都訓唔到,我睇唔到我既將來,假設我真的變成終生殘廢,我又會唔會想繼續生存落去。

諗下諗下我差啲忍唔住就喊左出嚟,但係一諗到我喊既話抹唔到眼淚,我就強迫自己唔好喊出嚟。

最尾我迫自己合理對眼,叫自己咩嘢都唔好諗快啲去訓,但越叫自己去訓就越訓唔到,加上夜晚既病房熄曬燈既情況,好陰森恐怖加埋隔離床病人既鼻鼾聲,想訓到訓唔到。

第三十六章

第三十六章

好艱難先捱到朝頭早,反正都訓唔著,所以我在訓唔著既呢段時間嘗試一下抬高隻手同埋抬高隻腳。

初頭試既時候,手同埋腳都冇聽我支笛抬起,所以我決定轉為嘗試比較簡單既令到手指能夠郁動,經過一段既時間,我覺得自己可以令到隻手指有轉微既動作,但係我既角度睇唔到手既位置,所以我都唔太清楚呢個到底係錯覺,定真係我可以郁到。

我老媽子來探病既時候,我有嘗試郁動手指俾佢睇,她證實我手指係有輕微地郁動,並不是我的錯覺。其後醫生提及如果持續自行訓練的話,身體的機能的確有機會慢慢好轉。不過現階段還是找不出任何理由去解釋我不能自由郁動的原因。

Ashley時不時都有過來探我,但我唔係太想佢見到我咁樣,所以我通常都想趕佢儘快離開,如果我可以郁動的話,我諗我會丟東西趕佢走。但我連抬高隻手都做唔到既情況下,我只好當佢探病既時候扮好叻或者扮訓。

其實意外之後我一直都好唔開心,宜家我不能控制大小二便等同一個廢人一樣,但我唔想佢擔心我,所以一直都扮冇野扮到好堅強。只係經常扮唔舒服,唔想同佢有太多交流,因為我好驚我同佢傾偈之後,我會忍唔住會喊出嚟,我唔想喺佢面前喊,男人老狗喊係極度樣衰既一件事嚟。

所以我就同老媽子講,當Ashley來到既話,同佢講我訓左,然後叫佢儘快離開。

通常Ashley見到我訓著左,都會陪我老媽子傾一陣偈先走。

而我會等Ashley走左之後,爭取時間不斷地嘗試郁動自己既手指同埋腳指。

除左我自己既嘗試,物理治療師亦有幫助我復原。

最後用左五日既時間,我最終可以令到自己的手指及手腕能夠郁動。物理治療師說如果按照呢一個進度,我下一步就是開始訓練其他動作。

而我受傷之後,老媽子有預期我未能這麼快能夠上學,所以決定幫我呢個假期完左之後,就去同學校方面申請暫時停學,等我好返先再安排重新返學。

第三十七章

第三十七章

經過了好幾日的努力,我終於都可以令到自己的手指及手腕能夠郁動。物理治療師說如果按照呢一個進度,我下一步就是開始訓練其他動作。

而時間亦來到

十二月三十一日,阿康一大早就走過來探病,條仆街仔同我講打機,佢話隻mh出左之後冇耐我就受左傷,佢宜家同埋一班同學仔組團去屠龍,宜家變左三缺一,叫我拿拿臨好返一齊打機。

「打你個死人頭咩,臨近公開試,你要去溫書而唔係去打機。我宜家受傷冇得打既時候,你同我講咩野打機。」如果我可以起身,我一定會追住阿康打佢一身。

「你有所不知,我呢家係激發你既求生慾望,令到你一個目標去積極做康復訓練。」

「我又未死,你講咩野求生慾望呀!」我用盡全身既氣力,向阿康舉起了中指。

「你睇下,我既一句話輕易激發你既潛力,你能夠舉起中指,呢一個就係只有我能夠引發既神蹟。」

「蹟你個死人頭,呢個係我辛辛苦苦訓練得到既成果。」講完之後我收返起向阿康舉起既中指

「郁得返就有希望,我信你可以好得返,好返之後除左屠龍,隊波重等緊你去做龍門守龍,冇你守龍我先冇任何後顧之憂,可以放心去攻門。」

「到時候再講啦!我宜家只係可以郁手指同埋手腕,我連拎起碗飯都冇力,我重要等人餵我食飯。我重邊有力氣去做運動。」

「妖,你之前連手指都郁唔到,宜家短短幾日咪又郁得返,係兄弟既就聽我講,唔好再自怨自艾成個怨婦咁,俾心機做康復訓練,好快就會好返。重有,我聽Auntie講你條死仔呢幾日都避緊Ashley。咁做有咩野意思?佢都係關心你先探你,你係唔係要等到佢既耐性用完,真係唔再探你先安落。」

「兄咩野弟,你試下好似我既情況,全身都郁唔到,你先會知道我既心情,你話我自怨自艾,咁你又有冇諗過宜家我雖然可以郁動到手腕同手指,但係已經用盡左我全身既力氣先可以做到輕微既動作。你講得好輕鬆,努力訓練就可以郁得返,但我宜家唔知道會唔會最儘只可以郁動到手指做呢啲動作。你估我唔想見到Ashley咩,但我宜家成個廢人,我唔想俾佢見到我宜家個樣。」我越講越激動,我用接近咆哮既語氣對阿康講呢一番說話,說完我需要深呼吸才能平伏返情緒。

阿康等我講完之後,靜左好一段時間。我從來未試過對佢發咁大既脾氣,我同佢相處一直都係嘻嘻哈哈,所以佢一時三刻都唔知講咩野好。

「對唔住!我唔應該講你自怨自艾,我只係想好好鼓勵一下你,但我用錯左字,我冇諗過你會咁嬾,亦有諗過你既心情。」阿康打破沉默,第一時間係同我道歉。一直都嘻皮笑臉既阿康,我是第一次見到他咁誠懇既態度向人認錯。

「其實我都有唔啱,我唔應該對你咁大聲,但係最近我既心情真係好差,我就算好努力咁去練習,但係得到

既唔係我預期既回報。我嬲我點解要受傷,我嬲我點解撞車撞到咁嚴重,我嬲我亂咁向關心我既人發脾氣,每一個同我講只要慢慢訓練就會好得返,大家對我既期望越大,我既壓力就變得越大,我唔係要聽安慰同鼓勵既說話呀!」講完之後,我最後忍唔著喊左。

「知道啦!如果喊可以令你舒服啲,即管放心喊,冇人會笑你。」阿康捉住我隻手,再輕輕拍我既手背。

聽完阿康講,我既眼淚更加收唔到,喊到成個豬頭咁,阿康今日所講既野令我崩潰爆喊,同時間我亦因為喊完之後,釋放左呢段期間所承受既巨大壓力。

「原來喊出嚟真係好有用,但我諗我唔會再喊,同埋你講得啱,我唔應該再去逃避Ashley。」

「你諗通左就最好,你係我兄弟呢個事實永遠都唔會變,唔同你傾住啦,尋日我其實冇返過屋企訓,一陣返屋企沖完涼訓陣覺有其他節目。」說完之後,阿康拍拍我既膊頭,然後拎起個袋就轉身離開。

當阿康走左之後,我先醒起今日係除夕,如果我冇受傷的話,唔知可唔可以約到Ashley去倒數呢。

呢一刻,我突然間發覺,之前幾日逃避Ashley既行為好白痴。呢一刻我好想快啲見到佢,如果佢探我,我決定唔會再去逃避佢。

第三十八章

第三十八章

Ashley今日亦有過嚟搵我探病,如同朝早同阿康講既一樣,呢一日我終於冇再逃避同佢見面。

「對唔住,我最近一直都避緊你,我唔想你見到我好似一個廢人,所以先唔想同你見面。」護士小姐幫我坐調整坐姿並離開後,我與Ashley終於再次傾偈。

「我冇怪你喎!出左意外,俾著係我,我都未必可以咁快接受得到,你冇自暴自棄,我已經覺得你好勇敢啦!」Ashley在病床旁邊一邊切蘋果一邊對我講。

「今日係十二月三十一日,如果當日沒有意外,你估下我會唔會約到你今晚出去除夕倒數呢!」我說完之後,望向病房掛起的時鐘,現在是晚上時間的7:15分。

「唔知架!我有好多朋友等住我約,如果你冇意外既話,我應該會同朋友出街食飯,之後到尖沙咀海旁倒數,可能你呢一刻未必會見得到我都未定。」Ashley用叉子拮了一塊蘋果然後餵我食。

「照你咁講既話,我係唔係要慶幸俾架車撞到入廠,咁樣先有機會佔用到你既時間。」我一邊咬爛個蘋果一邊笑笑口地答。

「你今日都唔會佔用到我好多時間,一陣探病時間完左,我就會返屋企,出面太迫我都係決定唔倒數,返屋企食完晚飯我會睇下書靜靜咁過。」

「講起書,我都好耐冇去圖書館了,未認識你之前,我一到放學就會去圖書館借書。認識你之後,我就好少再去圖書館了。」提起書,我又諗返起初次在圖書館電梯遇見既場景。

「你好返之後,我可以陪你一齊去呀!但我好好奇點解關認識我之後,會去少左圖書館?」

「因為認識左你之後,你比起去圖書館睇書更加有趣,所以就少左去圖書館了。」

「有趣?我竟然比起圖書館有趣?咁我點有趣法?」Ashley講完之後塊面有少少紅,可能覺得尷尬既關係,佢托一托眼鏡,唔等我開口,然後將一塊蘋果塞入我口。

幾經辛苦之下,我終於咬爛佢餵俾我既蘋果再吞落肚。

「唔知呢!我都唔太清楚到底點有趣法,我只係覺得同你一齊既時候,我就會覺得好開心,但點解會開心,我又唔知點解。」見到Ashley岩岩面紅尷尬既樣,我開始語無倫次,睇落講左一大堆野,但完全講左咩野,我諗連我都未必清楚,更何況係Ashley。

「其實你知唔知自己講緊咩?我完全覺得你講左等於冇講。」

「哈哈!我唔識得去形容,總之就有趣啦!」呢一刻既我,冇理由同佢講,我鐘意你,你就算咩野都唔做,只係坐在我面前,我望住你個樣,都會好開心。

「你都幾無聊,講到好有趣又講唔出點有趣法。」

「唔好再講呢個話題啦!話說我可以郁得返,我示範俾你睇,我宜家可以郁動到手腕同手指。」其實我覺得岩岩呢個問題,同個女仔問你點解鐘意我一樣,當被問到既時候,冇辦法可以解答得到。所以為左避免呢個尷尬既話題再繼續,我刻意轉換話題。

見到我能夠郁動手指,Ashley總算流出真正的笑容,意外之後她探望我的時候雖然有時都會有對我微笑,但總覺得她的表情感覺總是帶有一絲絲的內疚。

說真的,她不希望她帶著內疚的感情面對我,這一個意外並不是她導致,我不希望她背負著一絲一點的內疚去面對我。

「你咁樣笑咪幾好,我鐘意你呢個笑容,我同你保證我會努力去做康復的練習。我其實知道你對於意外好自責,亦面對好大壓力,但呢件事係意外,真係唔關你事,唔洗太放在心上。」

Ashley聽我講完之後擰轉身.我呢個角度之下,完全睇唔到佢既表情,但係我見到佢膊頭有輕微既上下起伏,我諗佢應該係喊緊都未定。

「我突然之間有少少唔舒服,我都係返土企休息先,我會再探你。再見!」我聽到Ashley的聲音顫抖地說。

「哦!再見,祝你新年快樂。」我唔太明白,我到底邊一句說話講錯左,令到佢有咁既反應。

Ashley最終離開左病房,而我則靜靜等候除夕的來臨。

第三十九章

第三十九章

時間來到晚上11：30,我用不算太過靈活的手指,在手機whatapp打訊息。

“新年快樂,接下來的這一年請多多指教” 打完這一段訊息後,我又在電話上刪除。

“新年快樂,祝你新一年過得開開心心。” 我將訊息再次刪除。

“新年快樂,這一年你辛苦了” 訊息被刪除。

訊息打好後,睇落唔太合適,我又再次刪除。

經過無數次的輸入再刪除,用了整整一個小時的時間,都還未有最後的定案,如是者時間來到12：55分。距離1月1日只餘下5分鐘的情況下,最終發出的訊息有了定案。

Ashley在whatapp的狀態還是在線,我估佢重未訓覺,而我則開始停數1月1日的來臨。

時間一分一秒過去,外面街道熱鬧地準備迎接新一年來臨時,而我所在的病房則好像處於另一個時空,其他病床上的病人都昏睡了,只有我一個人看著電話的時鐘準備倒數。

過個時候,在醫院外的馬路,開始陸續有汽車響啲的聲響。

電話的時間可能有延遲,聽到汽車響啲後,手機時間才跳轉到00：00。

「祝你新年快樂！」我到最尾傳出去的訊息,只有這五個簡單的字。

Ashley的whatapp狀態,顯示是輸入中。而我期待著她回覆的訊息。

第四十章

第四十章

「新年快樂,身體健康,最重要儘快康復。」手機傳來的訊息,感覺不似平時的她,感覺好似多左一份疏離感。

「嗯,不用擔心,我會好好做復康訓練。」

其實我本來想同佢講對唔住,同埋想問佢啱啱探病我係唔係講錯左咩野,令到佢唔開心。但諗深一層,問左又有咩意思,到時佢答我冇事呢個係我錯覺,我最後都係唔知咩嘢令佢唔開心。一諗到呢度我就灰左,所以我再一次將打好既訊息刪除,然後順應她的訊息回覆。

「時間不早,你早點休息吧!我都係時候訓啦!早抖。」

「早抖。」將訊息發出後,我將手提電話關掉。

除了Ashley,阿康重有其他同學與朋友都有向我發訊息慶祝新一年的來臨,但現在我完全沒有心情去查看或者回覆他們的訊息。

我再次重新回想起和Ashley較早時間的對話,還是未能夠想出咩事令到佢喊既原因。

是因為我指出她不需要自責嗎?但這是我自己疏忽做成的意外,沒有理由要她承受壓力。

而按照觀察所得,我的家人應該都沒有向她抱怨,需要她負上任何責任。(如老媽子真的有任何埋怨,她應該不會讓Ashley探病,而且在她口中她對於Ashley差不多每天探病是讚不絕口。)

到最後我完全得唔到任何結論。而我覺得可以解答我問題,又比較了解女生的人,只有阿康可以幫我。

我本來想立即whatsapp俾阿康,但佢探我個時話有節目,呢個時間應該攞緊女,就算問佢都未必會回覆到我,咁唯有明天再問佢意見。

第四十一章

第四十一章

「新年快樂,尋日好早訓左睇唔到訊息,有野想請教下你,有時間打個電話俾我。」訊息發出不到五分鐘,阿康就打電話俾我。

「喂!有咩野事要問咁緊張,重要到我打電話俾你先講得?」阿康既聲線似啱啱訓醒,但背景既聲就非常嘈吵,應該在街上。

「我想問下咩情況之下,女仔會突然變得對你冷淡?」

「咩話?你把聲距離好遠同好細聲我完全聽唔到你講咩?」

可能我用手提電話免提裝置的關係,加上在醫院我唔想大聲講電話,所以阿康身處的嘈雜環境下,完全聽唔到我講咩。

我嘗試拿起免提裝置的貼近嘴邊,然後再次重複啱啱講嘅說話,結果阿康都係話聽唔到我講咩,所以索性佢就嚟咗醫院搵我。

「做咩事要令到你咁心急一定要我答你,同埋好心你唔好再用耳筒嗰隻handfree,我完全聽唔到你講乜嘢!你宜家再講多次你想問我既問題!」

「我窮呀,買唔起靚既無線藍牙handfree呀!我想問,喺咩情況下,女仔會對你突然間變得好冷淡?」我再次重複我想知道既問題。

「吓,有好多情況都會令到女仔變得好冷淡,我要知道你究竟對佢做過咩嘢,先可以分析得到。」

阿康講完之後,我就將我同Ashley既對話過程俾佢知。

「我覺得你應該要盡快同Ashley道歉。」

「道歉不是問題,但是我比較想知道我對話當中,有咩原因令到佢會突然對我冷淡左。」

其實本身我都有諗個道歉,但係我都想知道我道歉嘅原因先。我不是想逃避責任,只是我怕她問我道歉原因時,我答不出來。對於道歉原因不明的情況下,呢個根本不是解決問題的辦法。

「

首先,對方既壓力,並唔係你一句話無需要自責,就可以當冇事發生。其次,當熟悉既人在面前發生意外,佢可能面對既唔止係壓力咁簡單,佢有可能更需要面對意外後既恐懼感,佢經常性過來陪你,係想令到自己忙碌,從而忘記當時的意外經過。」

「這分析是出於你的個人經驗?」阿康講的說話是有道理,但是他的分析好像有些不對勁的地方。

「唔係,之前Ashley在你出意外個一刻,其他人報完警之後,佢用你電話打俾我,當時佢係嚇到語無倫次,不停重複講你撞左車,我要不停同佢講叫佢跟埋去醫院之後,我會跟埋過嚟,佢到我嚟到之前都重係好驚

。經過護士安撫過同埋我都有陪佢傾過之後,佢先平靜落嚟。同埋係我叫佢令自己忙碌啲,可以令佢唔洗諗返當時既情況。」

「咁你做咩唔直接同我講原因出嚟,係要我講同佢嘅對話同經過俾你知。」

「我需要從你口中得知事情既經過,先知有咩地方有問題,我一開波就同你講啱啱講既野,你會入耳咩?同埋我要你講出嚟,係想你喺回憶既過程,諗返起你自己有冇做錯到,但你好似唔知自己做錯左咩嘢。」

「咁正常見到佢好大壓力,叫佢唔好自責有咩錯。」我到呢一刻都依然覺得冇做錯唔應該自責。

「你條友真係唔識㗎㗎!你錯在明知佢係自責緊,你都叫佢唔好自責,講野冇心聽者有意,你宜家同當面責怪佢有咩分別。」

我聽完阿康講之後呆左,我從來冇諗得咁詳細,個一刻我真心只係唔想Ashley再唔開心。但冇諗過呢一句話,竟然會對佢有咁大殺傷力。

「咁宜家可以點做?」

「等Ashley再來既時候同佢道歉,雖然佢唔開心,但我覺得佢會再來探你。到時候你再好好道歉就可以了,記得唔好再混講野,你唔洗問我點道歉,我只係同你分析件事,就算我教你點道歉,人哋點都會睇到,倒不如你真心諗一句道歉既說話好。我走自,條路我就指引左俾你,要點做就睇下你自己做化。」

第四十二章

第四十二章

阿康走後,我有考慮是否用whatapp與Ashley道歉,但想了想還是見面的時候道歉會比較有誠意。

如阿康所講,Ashley的確再次來探我,但是她探病的時間是對上一次探病的三日後。

這短短的三日時間,對我來說有度日如年的感覺,我不停在腦海中預演道歉的情景與對白,除道歉外我更加打算向她表白。

當Ashley在我面前出現,我先知道有啲野講出口並唔係咁容易。

「幾日冇見,最近幾好嗎?」老土到不行的開場白,我講出口都覺得白痴,我明明要道歉,但喺度講埋啲廢話做咩。

「幾好呀!之前借的圖書就快過期,所以呢幾日我花時間睇書冇過到嚟。」

「哦!原來係咁。」當我答完之後,完全沒有話題能夠接下去,雙方都沉默了一段時間。

而Ashley喺呢段時間再次準備為我切蘋果。

「係呢!」「係呢!」當蘋果剛剛切好既呢瞬間,我同佢都不約而同咁同時開口。

「咁啱既,你有野想講?不如你講先。」Ashley決定俾我講左先。

「對唔住,前幾日我講左唔應該講既說話,阿康有同我講你既野俾我知道,我一直都有留意你受到撞車件事影響咁大,我重以為你係自責既關係先會咁唔開心。」

「你講咩呀!點解我唔明你講咩既,我有咩嘢影響到呀!同埋我都有唔開心過,你係唔係有咩影誤會左。」Ashley否認左我所講既影響,同時亦否認自己有唔開心過。

「疑,乜原來我誤會左,不過你有其他唔開心既事,想同人傾訴,都可以同我講?」既然對方都否認,我都有必要堅持,唯有同佢講有事記得話我知,而之前諗既表白內容,在呢一刻真的很難說出口。

「我講完要講既野,你啱啱想講咩嚟!」

「我想講,放完聖誕假,好快就要考mock,想問下你到時好返會唔會返去上堂,班同學仔應該都會掛住你。」

「呢個問題其實我有同我老媽子傾過,我預期自己未必能咁快能夠上學,就算我想去上堂,但屋企與學校距離又很遙遠,我唔想屋企人日日咁辛苦推我返學同放學,所以放完假之後佢會幫我同學校方面申請先停學,而會考方面就睇下康復情況,如果活動情況冇改善,應該很難容許我去考試,到時應該會放棄留返之後再考。雖然我都好掛住班同學,但停學我同屋企人都決定好,宜家應該以復康為優先次序。」

「都岩既考試都真係需要睇身體狀況,身體未康復既話都真係會有影響,不過停學之後再重新學習既話,

會唔會驚迫唔上進度？」

「呢個到時候先再諗,宜家都唔知需要幾耐時間去康復,連身體都未準備好,講學習進度其實冇咩意義。」

「咁你記得好好做復康既訓練,我再幫你諗下學習問題可以點解決。」

「我呢度其實都決定左,唔洗擔心咁多,不過你都係時候諗下自己點應付個公開試,你覺得自己有幾多成把握。」

「照返之前既小測成績,我諗唯一要擔心既係會計科,balance sheet既項目我成日都放錯邊,攞到兩邊balance唔到要從新計過。」

「你唔記得左阿sir講過,只要操熟past paper,就好自然錯多幾次會知道錯喺邊度。放心啫,宜家先1月重有大把時間操卷。」

「一睇到條題目有水蛇春咁長既項目要分類,我每次操圈就想作嘔。」

講到呢度Ashley忍唔住不停搖頭,睇見佢呢個樣我就覺得我道歉完之後既呢一段時間,眼前既Ashley比我感覺唔再好似之前咁陌生,我唔知道我頭先既道歉有冇用,但眼前既人終於俾我有返一個熟悉既感覺,她回復返到之前,一個令我十分喜歡及欣賞既爽朗女生。

其實照阿康所講,如果用繁忙去令佢唔好諗返起意外發生所帶來既恐懼,我諗讀書會比起過來探我更加好,最起碼咁做唔會影響到佢既學業成績。

到最後Ashley離開,我都冇同佢表白,因為對於從未拍拖過的我來說,表白唯一要顧慮既,就係萬一對方拒絕,我會唔會失去埋同佢做朋友既資格,萬一到時真係連朋友都做唔到的話,呢個犧牲太大令我唔想表白。喺有100%把握既時候,我決定將表白放埋一邊先,我真係冇辦法接受到連Ashley都要失去呢個打擊。

第四十三章

第四十三章

寒假結束左之後,老媽子幫我同學校申請暫時停學。

呢段時間,我每一日都好努力咁去做復康訓練,所以身體康復既進度比我預期好,我宜家手部既活動能力,我覺得已經復完了六成。

對比起走路的復康訓練需要物理治療師的輔助,手可以自行訓練而不需要物理治療師,只需要借用一些道具就可以進行練習。

呢段時間,Ashley每個星期五放學後都會抽空過來醫院探我,同時間佢會在探病既時間放低一本呢個星期老師教過,佢重新整理過既手抄筆記。

我其實有問過佢,我停左學,點解重要交低筆記俾我。佢答我平時我在醫院應該悶死,所以就拎筆記俾我睇,佢覺得學習停左之後,要重新開始學習會好困難,加上在沒有考試壓力既情況,同理在醫院零娛樂既情況下,冇咁容易分心學習會更加容易。

另外,交俾我既筆記係重新整理既關係,佢會當作複習一次呢個星期學左既野,而且佢覺得重複睇自己既筆記比較難記入腦,但手抄一次她覺得這樣子會有比較深刻的印象。加上在堂上聽書,好多時候都就咁寫落筆記就算,未必會去了解,但是整理筆記過程當中,有唔明既時候,佢會嘗試去睇返書去理解,對於理解課文內容會有幫助。

雖然唔太明白佢講既好處,但在醫院接近零娛樂既情況之下,)睇Ashley俾我既筆記的確可以令我消磨時間。(老媽子扣起左我部psp,佢話在醫院唔俾我打機,而我既娛樂其實只係得一部手提電話,加上數據有限既情況底下,等同於只能用來whatapp既電子垃圾,所以我在醫院的確係零娛樂)

我手康復既情況能力咁快有改善,除左係自己做復康訓練既原因之外,其實好大程度上,都係因為Ashley建議我唔好只睇筆記,嘗試自己都試下做手抄筆記。當抄寫得多,變相亦能夠訓練自己既手部靈活程度。

對於筆記上的內容有不明白的地方,我都會特別寫在紙上,當Ashley來到我會連同舊的筆記一併交給她,如果她不能即時解答時,她有時候會回到學校問老師得到答案後再講解一次俾我知。

呢段時間,雖然我同佢既互動都離不開溫書同學習,但呢段時間我沒有沉悶的感覺,反而重覺得幾充實。

第四十四章

第四十四章

除左Ashley會到醫院探我病,其實阿康呢段時間都會隔一個星期探我一次。

如果Ashley係善良既天使的話,咁阿康一定係邪惡既魔鬼。

這一次來探病的時候,佢同我老媽子講推我出去醫院範圍外的空地呼吸一下新鮮空氣。

佢知道我在醫院零娛樂,所以當我推出去既時候,借左佢部psp俾我玩。

經過上次佢叫我道歉既對話之後,這一次探病的時候,佢問我有冇好好道歉。

我將當時既情況同佢講完之後,佢有問我後唔後悔冇表白。

我其實怕表白完連朋友都冇得做,,多過冇表白而令自己後悔。兩害選其輕的情況之下,我覺得不表白這件事我不會後悔,最少我在這一刻想得到Ashley既關心。

「幸福是需要靠雙手去爭取,我還是覺得你應該表白,如果是對你沒有好感,會同你聖誕節出街咩?佢意外之後差不多每一日都會探你病?重會為你準備好筆記?」

「幸福呢兩個字,你唔覺得同我相差好遠咩?萬一我下半生都係要坐輪椅.你覺得我重值得去爭取幸福咩?」

雖然我現在可以用助行架行路,但在別人眼中,需要用助行器的,其實等同於我是一個傷殘人士,我之前都曾經試過帶有歧視既眼光看傷殘人士以及與他同行既人。所以一諗到我如果真係不能完全康復的情況,需要接受別人的歧視目光,我就覺得幸福離我好遠,而當日細膽沒有表白的決定,可能不是一件壞事。

「幸唔幸福唔係你一個人自己既想像做決定,而係由個現實去幫你決定。與其擔心之後會不良於行,倒不如努力去做康復既訓練,未訓練之前,你唔係連下半身都郁唔到咩?當日如果唔係你自己嘗試去郁動手指,你宜家可能連手指都郁唔到,做咩你咁快就諗住放棄希望。」

「你講話我放棄,係你誤解左我,我身體狀況我自己最了解,訓練我一直冇放棄過,但復康的情況理唔理想我自己知,宜家我能夠用助行架行路,我覺得已經到左極限。」我一邊摸住自己隻腳,一邊同阿康講出自己既諗法。

「Sorry,我語氣重左少少,你話你到左極限,但呢一個極限始終係你自己set俾自己,你應該將個極限提升,你睇龍珠你幾時見過悟空會滿足自己既極限,人人都當超級撒亞人係極限,佢最後咪超2超3超4咁樣去突破自己既極限。」

「極限係我自己set俾自己,但你用龍珠呢個比喻好唔現實,係人都知道呢套係漫畫唔係現實。」

「咁我唔用龍珠,咁我用MH去做比喻啦!你重記唔記得第一次打崩龍,我地打到夠鐘佢都未死,但不斷去挑戰既情況下,最後打得死,再到我哋挑戰極限,用比上一次更短既時間去殺死佢。呢個咪就係證明到極

限係可以突破得到。」

「點解你可以扯得咁遠,你食錯左咩藥?」

「你就食錯藥,我只係想鼓勵你叫你唔好放棄啫。我哋都出左嚟好一段時間.係時候我推返你入病房。」

「唔好咁快推我返病房,我重想玩多陣MH。」

「唔得呀!你出左咁耐,一陣伯母會鬧我。」

阿康推我返到病房就走左,呢個時候我覺得,認識到阿康呢個朋友,其實都幾幸運,雖然佢份人對女仔會口花花,但呢一刻佢作為兄弟,難得嘅係佢收起佢口花花既性格,咁認真咁去鼓勵我。

第四十五章

第四十五章

隨後嘅每一日,我都係喺物理治療,抄筆記溫習中度過。

有一日嘅朝早,旁邊病床的老伯突然失去知覺,醫生與護士立即為他進行搶救,但是始終救唔返,我冇諗過日日捉住我要我陪佢捉棋,說話中氣十足的人,會可以突然之間話走就走,生命脆弱到令人難以想像。

我諗返起當時從老伯口中得知,他是獨居老人,他在一次義工探訪活動時突然之間暈倒,當時義工立即送他入院,醫生判斷他患有心臟病,於是就要求他住院觀察,他說自己是早我一日入院。

除了老伯剛入院的幾天有義工與社工探病外,我從來沒有見過有家人找他探病,所以他悶的時候會搵我傾偈,同埋每日都會教我捉棋,剛剛入院的時候,他有說過我現在的狀況捉棋可以訓練腦部之外,更加能夠多活動手部動作會更有效去康復。

我當時不知道他到底是想我陪他捉棋的藉口,還是捉棋真的會對復康有效用,但我從個一日開始,我差不多每天早上吃完早餐都會與他捉棋。

有時候老媽子或Ashley探病時會有切好的生果,當我食唔曬就會同老伯分享生果,到後期就算食唔食得曬都好,都會叫老伯一齊食。

我記得上星期Ashley探病時候講過,橙會惹痰所以儘量唔好俾老伯食,但我冇和她爭論過蘋果對於老人家不是會較難咀嚼的時候。

老伯聽到這句話之後,在我面前起棚牙「我棚牙不知幾健康,我八十歲人從來未甩過一隻牙,你就聽下妹妹仔講,佢有佢既道理,加上你兩個後生仔對我老人家都咁關心,我就已經好足夠,生果是賣給你的,你喜歡食咩水果都有問題。」

「伯伯你真係從來冇甩過牙咩?細細過換牙既時候應該甩過先係架!」在老伯面前我總是會口沒遮攔地說話。

「喂!你唔可以對老伯咁冇大冇細,快啲同老伯道歉。」Ashley睇唔過眼要求我同老伯伯道歉。

「嘻嘻,咁都俾你捉到我字虱,妹妹你唔好嬲啦!係我要求佢唔洗當我長輩咁看待,佢咁樣我先會覺得自己年輕一點。」

老伯伯對於我取笑他並不介懷,反而開始為我講好說話。

「聽到未呀!老伯唔似咁小氣嘅人。」得到老伯的支持,我變得更加囂張起來。

「我冇你哋咁好氣啦!你生果食完我都係時間返屋企啦!下次我探病嘅時候再見啦伯伯。」

Ashley走左之後,老伯伯就撩我傾偈。

「喂!宜家好少可有女仔咁識得尊敬老人家,呢個女仔要好好珍惜。」

「咁意思呀!又係你話叫我唔洗對你客客氣氣,又話最驚人覺得你老,又話尊敬長輩既人全部都好假,宜家轉過頭你同我講佢尊敬老人家同埋要珍惜佢。」

「尊重長輩都要分真心同假意,你就可以不用勉強自己,而我睇得出佢係出自真心,宜家好少呢種咁乖既後生女了。」

「竟然讚佢乖,咁下次佢探病既時候,我在你面前當面同佢講話你讚佢乖先得。」

但係好可惜,等唔到下一次既探病,老伯伯就已經離開左,我再冇機會在他面前轉達他所講的說話。

第四十六章

第四十六章

醫生宣告老伯死亡後,因為他本身沒有能聯絡得上的親人,所以醫院很快就安排工作人員將老伯的遺體運走。

而遺物方面,他來的時候,好像只有一副木製象棋盤,少量的衣服,銀包與及一本聖經外,並沒有其他多餘的物品。

醫院據說整理好後,會安排之前負責的社工去認領遺物。運走的屍體,先被安置到殮房等候下一步的處理。

回想起今天早上食完早餐,一切都好似同平時一樣,佢叫我同佢捉棋,捉完棋之後,他突然話好想食薯片,叫我幫手去買,我本來想等到屋企人嚟到既時候叫佢哋幫手買,但係老伯話可能我屋企人會覺得佢係老人家,所以唔會買薯片俾佢食,所以佢到最後都重係堅持要我去幫佢去買,重同我講話多行幾步路可以有助康復。

所以最後我迫於無奈的情況之下,用助行架慢慢行到醫院地下大堂的便利店買薯片給他。

一來一回應該用左差唔多二十分鐘嘅時間,當我拎住薯片回到病房的時候,醫生已經停止搶救並宣告老伯的死己。

老伯前一刻重同我傾偈,但短短的二十分鐘的時間,返到病房時,佢竟然變成一具冷冰冰嘅屍體,我一定是在發夢,我隻手拎住薯片呆呆望向老伯病床,望咗好長的一段時間,我到宜家都重未能接受佢離開嘅事實。

老媽子嚟到醫院嘅時候,了解過情況之後,話老伯可能知道自己就快要死,佢唔想俾我睇到佢痛苦嘅樣,所以先會耍走我叫我離開病房。

神經病,知道自己死所以耍走我,成件事都好唔合乎邏輯,你叫我點去相信。

不過我同老伯沒有血緣關係既情況底下,明明我同佢只係相識咗好短嘅時間,但係當知道佢離開左之後,竟然會令我有種掛住佢嘅感覺,但你問我有冇傷心嘅感覺?又好似感覺唔到自己對老伯的離開有任何一啲嘅傷心,只係心入面既懷念係揮之不去。

成個上晝,我都沉沒喺同老伯相處嘅回憶當中,完全唔想同其他人傾偈,老媽子見到我咁既情況,唯有等我一個人靜靜地,唔去騷擾我。

第四十七章

第四十七章

「喂！阿full。」Ashley坐在我的床邊，佢把聲將我拉返嚟現實，我啱啱好似諗下野不知不覺間訓著咗。

「你嚟左呀！啱啱朝早老伯走咗！」我嘗試壓抑住自己嘅激動，用一個十分平淡嘅聲線去講返老伯死亡既事。

「嗯！我知道，Auntie
啱啱有同我講過。我想你明白生老病死係好平常嘅事，第一次親身體驗身邊認識嘅人死亡同埋意外係一啲都唔好受，但過左一段時間之後就會冇野，個種唔開心，個種恐懼嘅感覺我都經歷過。如果覺得唔開心，講出嚟或者喊出嚟都會對你有幫助，你唔需要喺我面前壓抑住自己嘅情緒。」

「我好記得佢前今朝重同我捉棋，我只不過出左去病房一陣，真係好短好短嘅時間，返來佢就走左。」

「你係唔係覺得自己個一刻咩都做唔到，係唔係覺得呢件事冇可能發生，你撞車個時我都有個呢種感覺。只不過好彩嘅係你最後你可以醒返，而老伯則失救離開左我哋。」

「好對唔住，我冇諗過我撞車會對你有咁大影響，我重叫你唔好自責，我宜家先真真正正體驗到你既心情。我啱啱一直都諗緊，如果我早一步察覺到老伯有異樣，沒走去買薯片而係走去通知護士同埋醫生，老伯會唔會有得救。」

「發生就既事，從來都冇如果同早知，就好似我都有諗過，如果當日我遲少少到或早少少到咗嘅話，有冇機會令你唔會俾車撞。但發生咗既事就係發生咗，我同你都冇能力返到過去，去阻止悲劇既發生。」Ashley坐喺床邊，借左個膊頭俾我，然後又用手輕輕撫摸我的頭。

「對唔住，我一直以為意外只係得我一個人受到影響，我當時唔開心重要避開你，冇諗過你個一刻都需要人關心，好對唔住。」Ashley既輕撫加上她對我說出的親身經歷。雖然從阿康口中我知道Ashley在呢件事當中，精神曾經受到打擊，但如果唔係老伯死走咗，我都冇真正意識到我撞車會對佢嘅傷害是有幾咁嚴重。

我從來只顧著自己，從來都沒有關心過事情對Ashley的影響。其實當時我醒返個一刻，Ashley應該為左令我唔好擔心，雖然個一刻好唔開心，都要扮作鎮定冇事。

呢一刻我真係感覺到對佢嘅行為十分愧疚，本來都冇諗住喊嘅情緒被帶動出嚟，最後眼淚好似缺堤咁不停湧出，我個一刻咩嘢都諗唔到，唯一做到嘅就係不斷咁為之前嘅事同佢道歉。

第四十八章

第四十八章

在Ashley面前喊左好耐,而佢亦一直不停咁安慰我。

我最後心情平伏左以後,佢先返屋企。

第二日朝早,有個自稱社工既人搵我。

「請問你係唔係蔣富榮先生?」

「我係,請問搵我咩野事?」

對於眼前的人,我完全未見過,所以我都唔知道佢搵我到底係咩野事。

「我叫Tony,是跟進陳xx先生(這是老伯的名字)的社工,早上整理他的遺物時,發現藏在棋盤中有一封信,他在信封面指明要將這一個棋盤以及信交給你。」說完之後,他放低左我平時與老伯捉棋的木製棋盤以及一封信。

「請問信的內容是關於什麼?」對於信的內容我感到十分疑惑,到底為什麼老伯要留一封信給我?

「我唔清楚信既內容,既然封信指名要交俾你,我必須尊重他的私隱,所以我沒有拆開信睇過內容。你不如自己開封信睇。另外,陳伯在入院時,訂立了遺囑與身後事的處理方法,這一張是我的卡片,火化及告別式葬禮會在這下個星期天舉行,如果你想出席可以隨時與我聯絡。」

「俾少少時間我諗下,到時如果我出席我會提前同你聯絡。」Tony離開之後,我打開老伯俾我個封信。

「富仔,生老病死是很平常的一件事,當你看到這一封信的時候,,我已經離開了。你不用太過悲傷。人是很奇怪的生物,我寫這封信的時候,感覺到自己離死不遠,我活了這麼久,已經沒有什麼值得留戀,很高興你能陪我渡過人生的最後一段路,本來我的願望是看著你康復然後離開醫院,可惜我應該是看不到了。這一副象棋我拿不走,現在就留給你當做預祝康復出院的禮物。希望你能夠好好珍惜這份禮物。最後請代我和雅詩妹妹講聲多謝,現在已經很少後生女會咁細心留意老人家的需要。祝你們兩人都健康快樂。」

看完信之後,我望住老伯俾我既棋,然後打開棋盤,兩邊的棋都按照位置放好,在腦海中按照老伯平時的棋法戰術來對奕。

結果我最後都係敗在老伯的手上,老伯這是最後一次同你你捉棋了,我好想你教到我可以捉贏你,我真係好掛住你,祝你一路好走。

第四十九章

第四十九章

我最後決定出席老伯的葬禮,我有同Ashley提起過呢件事,佢話自己都想去見一見老伯的最後一面。

於是我就同Tony聯絡,話會出席老伯嘅葬禮。

當日我同醫院申請左外出一天,前一日我叫左老媽子拎一套前年出席親戚婚禮時訂造嘅西裝俾我。

當日Ashley同老媽子陪我嚟醫院出發,然後一齊出席老伯嘅葬禮,我老豆就決定唔出席。

Ashley個日著左件黑色的連身長裙,加上一對黑色的皮鞋。而我就嚟醫院換左一套西裝連黑皮鞋出席葬禮。

葬禮過程十分簡單,老伯在當天火化,義工帶了一個裝有老伯生前照片的相框。當火化完成後,大家在火葬場外的空地進行告別儀式。

嚟送別老伯嘅,除左我哋同埋Tony加幾個義工之外,重有老伯少量嘅朋友,不過就冇看到老伯屋嘅企人出現。

告別儀式結束後,Tony說老伯選擇了將骨灰撒到海中,現在正等候審批的過程,到時會有義工跟進,骨灰會交由義工拎返去中心暫存。

出席完葬禮之後,老媽子有事需要先離開,所以她拜託Ashley陪我返去醫院。

我最後並沒有立即返去醫院,而係任性地要求Ashley在火葬場外的空地陪我逗留一陣。

「好耐冇出過外面呼吸新鮮空氣了,唔好意思要你陪我,我唔想返去醫院住。」沒有在外面呼吸新鮮空氣是藉口,我只是暫時不想回到病房,我重未捨得離開呢度。

「冇關係呀!我最近準備考mock,日日都係返學放學之後去自修室溫書,吊頸都要抖下氣,宜家我陪你咪當俾個break。自己抖一陣間。」一邊講佢一邊扶我去一排長凳度休息。

「唔該你。」我在長凳坐低既同時,喺背囊入面拎出老伯留俾我嘅象棋。

「突然之間想捉棋,你想唔想捉?我記得老伯同你捉過話你有天份。」

「可以呀!佢重話我捉棋會諗埋對手會點行。但佢就話你只會睇眼前行既每一步棋。所以佢讚我捉棋叻過你多多聲。最重要既係你之前係我手下敗將。」

「得啦!幫手擺好盤棋啦!老伯講過棋一日唔練就會退步,之前我日日都有同老伯捉棋,你好耐先捉一次,個時輸俾你,應該都係你撞彩,呢一次我認真捉就唔會再輸俾你。」

「不如開個賭局,輸左既要滿足對方一個要求。」

「驚你呀!你等住輸俾我啦!」

如同老伯在信中所講,他不想任何一個人因為他的離開而感到悲傷。不過我對老伯離開的感情與其說是悲傷,倒不如說是掛念。

老伯送俾我既象棋,與其放在一旁睹物思人,倒不如好好和別人捉一盤棋,好好咁令呢件物品能發揮佢既功用。

第五十章

第五十章

講返我同Ashley捉既呢盤棋結果。

「將軍!你冇棋啦!呢次你又再輸俾我,唔知邊個話認真捉唔會輸俾我呢!輸左既人要点話?」Ashley行完呢一步棋之後,呢鋪棋正式玩完,贏棋既佢一面講一面拍我膊頭。

帥在車與炮的夾擊之下無路可退,我唯有乖乖咁認輸。

雖然我聲大大話每日都有同老伯捉棋,呢一次認真捉一定唔會輸,但結果我又再一次成為她的手下敗將。

「得啦!知你叻啦!輸左既人要滿足對方既要求,願賭服輸你有咩野要求講啦,我儘量滿足你。」

呢盤棋我接近所有棋都冇曬,俾佢剝光豬既情況下,都算輸得心服口服。

「你俾我諗一諗先,要求你做咩野好呢!」Ashley用食指輕輕托住副眼鏡,皺晒眉頭咁諗。

「你唔係諗好左先會提出賭局咩?」

「我冇諗過上次同你捉完棋過左咁耐時間,你捉棋都重係咁屎,所以冇諗過要求。」

「即係你就算諗住會輸,都提出呢個賭局?」到底係佢有自信,定係佢太過睇小我先咁做。

「錯啦!人要去到絕境先會迫到潛力出來,我諗住喺絕境中迫自己既潛力出來,點知唔好話絕境,連少少既挑戰性都冇。你盤棋差成咁,攞到好似我恰緊唔識捉棋既細蚊仔一樣。」

「我冇你咁好氣,你諗好再講你嘅要求,我執返好堆棋先。」

執拾好棋盤後,再將棋盤放回書包時,她還未想好我要滿足她的要求。

第五十一章

第五十一章

「大小姐我無欲無求,只係想你好好咁做復康訓練,儘快復康。」我冇諗過Ashley要我滿足佢=11pt嘅要求竟然係想我好好做復康訓練。

「你可以要求其他,野呢一個要求對你好好處,你唔會後悔咩?」

「唔會呀!你好返=11pt嘅話,呢一個願望我覺得就足夠,更何況我都有講過我=11pt嘅要求一定要對自己有好處。你咁講,唔通你諗過我輸就會提出一個對自己有好處嘅要求?」

「我似咁嘅人咩?同埋賭局輸嘅人要滿足對方,係你提出而唔係我。」雖然我口講話冇,但其實我係有諗過,假如這盤棋是Ashley輸的話,可能會要求她做我女朋友,可能就係呢個諗法令到我分心,所以先會集中唔到精神去捉棋。

因為我講=14.6667px嘅唔係事實,加上當時我講個一刻,諗返起自己想要同佢表白,我就忍唔住臉紅起來,而Ashley亦察覺到我塊面紅左。

「口講話自己唔係咁既人,但你塊面出賣左你,好在盤棋係你輸左,如果唔係既話,我應該會俾你溶左都似。」Ashley講既同時,將雙手擺放於胸前。

「你都痴線,呢度太陽好曬加上天氣熱先攞到我面紅,唔好亂咁屈我。」

「Objection!法官大人,個太陽好曬呢個証供成立,但係宜家一月同埋溫度都未去到20度,天氣熱呢個原因唔成立。呢位證人既口供極度唔可信。」Ashley突然律師上身。

「你俾律師鬼上身呀?最衰呢一刻我身上面冇紅筷子。」

「頂你!在火葬場講咩鬼上身,係都你鬼上身先,同埋關身上冇紅筷子咩事?」說完之後Ashley雙手合拾,對住周圍不停拜拜。

「紅筷子,夾中指的作用是用來驅鬼,你有聽過嗎?」

「冇聽過,亦都唔想知,同埋我都有鬼上身。不過你咁鐘意我隻中指,我唔介意舉一舉俾你睇。」說完之後,她向我舉起了中指。

「女仔唔應該亂舉中指,你宜家著到咁斯文,冇失身份。」

「唔同你玩啦!都唔早啦!你係時候返醫院啦!」說完之後佢扶我起身,然後俾返枝拐仗我。

「你等我一陣,你在正門等我,我遲少少會出來。」

「OK!我在正門口等你。」

「老伯,再見啦!我同雅詩都過得好好,唔洗太過擔心我哋,我搵到佢呢一個好既棋友,你可以好好在天上睇住我哋捉棋同埋保佑我哋啦!」

說完之後我向剛才老伯火化的地方深深地鞠躬。

第五十二章

第五十二章

Ashley陪我回到醫院,佢臨走既時候,我再問佢賭局要求會唔會想變。
佢答我唔會,當決定左之後就唔會輕易咁改變。

所以我唯有乖乖咁聽佢說話,去做復康的訓練。

兩個星期之後,醫院睇過我既康復情況,認為我可以出院,而我亦唔想再喺醫院坐監,所以同屋企人決定做出院既手續。

離開醫院當日,我同所有曾經照顧過我的醫生護士們,同埋在同一個病房既病人們一一道別。

我冇諗過在醫院短短兩個月既時間,我要面對既事可以咁多,雖然醫院帶俾我好多回憶,但屋企先係我既安樂窩,能夠出院對我來說是一件好事。

我將出院既消息同Ashley同埋阿康講完之後,阿康就決定左在我出院第二日同我慶祝。

慶祝地點是在阿康的家,他說我行動不便,如果約在外面慶祝的話,其實對我來說極不方便,而地點係佢屋企慶祝的話,雖然地方唔大,但比起外面既環境就一定會更加舒適。

在細節方面諗得好周到,呢樣我諗就係阿康受女生歡迎的原因。

出院既第二日,剛剛好是星期六,不用上堂的阿康一早就到搵我話接送我過去佢屋企。

我宜家其實可以唔洗依靠輪椅代步,但阿康講話今日等佢做一日推車手,坐定定係架輪椅等我安心交俾佢負責推出推入。

而Ashley今日就需要補課,所以就晏少少先會合我哋。

第五十三章

第五十三章

阿康接完我之後，我同佢兩個人行超級市場買左一堆零食汽水。

推我入屋之後，佢將我膝頭哥上融既零食汽水都放上枱，然後扶我在梳化度坐。

「估唔到推住架輪椅都幾倦。」阿康一邊講一邊收起我張輪椅。

「頭先都叫你放袋零食在輪椅上面，我推住架輪椅行路就可以，你又話要照顧傷者，唔俾我落地，我早就同你講左唔洗推我架啦！你又唔肯，不過你身子差在咁多既，縱慾過度呀？」雖然我都知道推住我唔係咁輕鬆，但我點會放過取笑佢既機會。

「冇咁既事，同縱慾無關，只不過最近少左運動，唔知係唔係因為呢個原因影響體能。」阿康在超市購物袋拎左兩枝可樂，俾左其中一枝可樂俾我之後，就攤左係梳化度。

「因為臨近mock所以放學之後溫書而少左去踢波？」

「唔關溫書事，學校日日都補課，補完課個時間都好晏，重點會有時間踢波。」

「你之前連堂都會走，估唔到你會咁生性，日日都補課。」阿康平時鐘意玩多過讀書，好難想像佢竟然會願意放棄去玩走去讀書。

「冇計我之前走得太多，學校話唔出席補課，有機會累計然後當缺席一日，我再扣出席率的話，唔知會唔會俾人踢出校。」

「都臨近會考，乜你覺得學校重會踢你出校咩？」

「都係捱埋呢幾個月，為左玩俾人踢出校博唔過。唔好再講讀書啦！一講我就頭痛。」

「頭咩野痛，我連上堂都冇得上呀！我宜家都不知幾想頭痛一下。」

「其實你都出得院，點解唔叫屋企人同你取消左個停學安排。」

「宜家我隻手唔能夠好靈活咁郁動，冇可能應付得到會考，所以我先會決定停學。」

「其實我見到你既康復進度都唔錯，我本身都冇諗過你咁快可以出院。」

「醫生都有講過我進度唔錯，可能係因為後生，所以復原能力較快，但係因為咩野事唔郁得都重係未知道。」

「最重要都係能夠康復，咩野原因都冇所謂啦！不過話事話你同Ashley發展成點？」估唔到阿康傾傾下，會將個話題會突然間轉到去Ashley度。

「有咩發展，咪同之前一樣，我重未同佢表白。」

「重未表白?你諗住拖到幾時先會表白?我以為你們經歷左咁多野，你會同佢表白。」

「等佢考完會考先算!我唔想影響到佢考試攞到佢分心。你唔洗諗住出手幫我，我想一步一步嚟。」
我覺得阿康應該會想幫我一把，所以我預先同佢講好唔洗佢嘅幫忙先，同埋我都重係驚一表白之後，我連Ashley連朋友都未必有得做。

「你確定唔想表白?到時失去左你唔好後悔。」

「唔會後悔!我反而比較驚表白完影響到佢，你唔洗擔心咁多。」

「我只係想為兄弟既幸福著想，不過你到時需要我幫手的話，我一定會幫你。」

「唔講住啦!你諗住今晚食咩未?」

「我諗住叫Pizza食，平靚正同埋最重要係食完清垃圾都好方便，等埋Ashley上到嚟就叫得。」

「佢話今日只喺補到4:30，呢度同學校咁近，佢上到嚟再慢慢諗都唔遲啦!」

「咁好快啦!我拎隻monster hunter打住先!」

「我好多時都反應唔切，到時三貓唔好怪我。」

「到時貓左你咪過區避下先，反正我一個人都夠做。」於是乎我同阿康兩個一面打機一面等Ashley放學。

第五十四章

第五十四章

手提電話傳來的電話鈴聲，扔完粒回家玉，我就放低部遊戲機然後聽電話。

「我放學啦!有冇咩野需要我買上來?」Ashley放學之後打電話俾我。

「唔洗買野啦!我同阿康一早買齊所有野，你過來附近先，我同阿康過來接你。」阿康聽到之後，閃左部遊戲機，準備同我一齊落街。

「唔洗接我啦!你都俾左個地址俾我，同學校咁近，唔洗專登接我，我直接上來就可以了。」

「OK!咁一陣見。」講完之後佢就收線。

「佢話一陣自己上嚟，唔洗我哋去接佢。」我轉述返Ashley啱啱講嘅嘢俾阿康知。

「人哋話唔洗你就真係唔落呀?你識唔識㗎，你唔搵佢，都最起碼落樓等佢啦!反正都係我推你落樓，快快手上你架戰車，我哋落樓等佢。」阿康堅持要我落樓，於是乎我哋兩個就落左樓等佢。

等左大約15分鐘，Ashley在我哋面前出現。佢對於我哋都落左樓感到十分驚訝。

「我唔係講咗話你哋在樓上等咩?呢個天氣咁凍，你兩個在樓下吹風，一陣病咗點算呀!」佢第一句就立即鬧咗我哋兩個一餐。

「我本身都有同阿Full講，叫佢在樓上等，但佢頭先收線之後，話驚你蕩失路，所以先同我講話要落嚟等你。」阿康隨口就作咗個大話出嚟，明明就係佢叫我落嚟。

「我睇穿咗你哋兩個，我先唔信係阿Full講話要落嚟，要在樓下等我嘅，一定係你諗嘅屎橋。」

睇嚟一切都逃唔過Ashley嘅法眼，我的確冇諗過落樓迎接佢。但阿康順水推舟送咗個大禮俾我，我有理由辜負佢嘅一番好意。

「唔緊要啦!我唔覺得凍，啱啱阿康屋企有少少焗，所以我叫佢推我落嚟抖抖氣，你唔洗咁勞氣，有咩嘢要講，上樓先再講啦!」

呢個時候，我出面做一做和事佬，等阿康唔洗食我呢隻死貓。

「係囉!上樓再講啦!阿Full幫你拎住個書包，你幫我拉住度門，等我推佢入大堂。」

講完之後阿康除底咗Ashley嘅書包，然後放咗上我大牌度。而Ashley則拉住度大堂門，等阿康推我入電梯大堂。

第五十五章

第五十五章

回到阿康的家中，他拿了一盒大富翁讓我們玩，7:00的時候，阿康拎張Pizza的外賣紙，然後叫我們決定今晚的晚餐安排。

「三個人的話，叫一個四人餐，薄餅你們選，飯要葡汁雞皇飯加一個肉醬意粉和闊條麵，汽水隨意就可以了。有沒有人有異議。」Ashley看了外賣紙後，很快就決定了。

「我沒有異議，反正我咩都食，阿康你來選薄餅。」講真，我其實對於食咩真係冇所謂，只要用我去諗就可以，所以我將個決定權交俾阿康。

「普通一個至尊批就可以了。不過我們三個人叫四人餐，真係有辦法食得曬咩？」

「三個人叫二人餐就會唔夠分，你兩個係男仔，食量應該唔會太差，到時食唔夠你可以留返聽日當早餐食都得。重有冇好睇少我，我下午只係食左三文治，所以其實我可以食好多嘢。」Ashley雖然看似瘦削，但我見識過她的食量，的確不用太擔心她食得不多。

「我可以保證，如果叫二人餐的話，一定唔夠三個人分，照叫四人餐啦！」

「OK！今日我老死出院，Ashley你不要爭，呢一餐我請，不過我好似唔夠錢，要落一落街襟錢，你兩個在屋企等我，我好快就返。」阿康好明顯想為我造一個二人獨處的機會。

「你爭幾多錢，我剛好有\$500元，就算是你說完請客，我都可以先付款，到時候你再還錢給我吧！」Ashley完全冇俾機會阿康借故離開。

「我唔想借你錢，加上我想落街買零食，你和阿Full慢慢玩住先，我好快就會返上嚟。」為求儘快甩身，他用九秒九的速度衝出門口。

「做埋啲無謂嘢。」Ashley忍唔住口嗡嗡一陣。

「係呢！你最近溫習進度點樣？跟唔跟得上？」得返我同Ashley兩個人，唯有開個話題等個氣氛冇咁尷尬。

「還可以啦！呢個時間基本上返到學校都係預備操卷，只要操得多就冇話跟唔上。差不多一星期冇見，你康復的進度如何？」

「我覺得情況比起之前好咗好多，最起碼我可以唔洗拎拐杖行到一段路，如果唔係醫院方面都唔會俾的先提早放監。」

「就快新年，你老媽子有問我會唔會搵你哋拜年，我未答佢，因為我要睇下到時屋企人拜年放唔放得人。」

「佢平時都冇叫開人拜年，你唔洗理佢，可能佢都係講吓，你唔洗咁認真。不過新年去人屋企拜年好悶，啲長輩自己傾偈，話題又完全係同其他親戚比較，我年年都唔太想去。」一講起新年我就頭痛，

所以我儘量勸佢唔好過來拜年。

「到時候先再講啦！我重未知拜年個日嘅點情況，到時如果我得閒先再搵你。」

門鐘喺呢個時候響起，阿康買完嘢食好快就上返嚟，我睇唔透佢係想俾我哋兩個人獨處，定真係有嘢要買。

「零食準備好，pizza我啱啱落街個時都叫埋，我哋暫時俾自己放鬆一下，同埋慶祝阿full終於出院。」阿康放低手上嘅零食嘍枱，然後倒左三杯可樂分別俾我同Ashley，而我同Ashley都同時拎起杯可樂做碰杯的動作。

第五十六章

第五十六章

當天晚上，我們三個人玩了一整個晚上，因為Ashley住得比較近，所以她玩到差不多12：00就決定返屋企。

當然玩到咁晏，我哋都唔放心俾佢自己一個人走，所以阿康就半強迫Ashley搭的士返屋企。

臨走嘅時候，我有叫佢返到屋企打個電話俾我報平安。

而我就因為住得比較遠，同埋我之前其實都有在阿康屋企過夜，所以我同佢屋企講會在阿康屋企過夜。

Ashley返到屋企之後，就打咗電話同我報平安，之後我都同佢傾咗一陣偈先收線。

「你真係重未同佢表白？」阿康等我收線之後問我。

「重未時候呀！宜家話曬都準備考mock同埋會考嘅時間都唔係淨返好多時間，我唔想影響佢心情。」呢個的確係事實，但最主要原因都係因為冇膽同埋宜家嘅身體狀況。

「我作為旁觀者嘅角度，可以話俾你知，你可以放心去表白。返屋企報平安，其實只會喺情侶之間先會咁做。不過睇返你自己點諗，你同佢宜家其實都好似拍緊拖，表唔表白我覺得都冇咩所謂。」阿康用佢嘅角度同我分析我同Ashley之間嘅關係。

「但我宜家咁嘅情況，雖然話康復進度良好，但係我唔知道身體會唔會100%復原得到，如果到時需要佢照顧我，我又唔想影響到佢下半生。」我將實際要擔心嘅嘢講俾阿康知。

「表唔表白其實睇你自己啦！但我哋宜家先咁後生，拍拖又唔一定會結婚，有啲嘢唔洗諗到咁長遠嘅。」

「我有自己嘅打算，到時再諗下一步點做啦！」其實阿康啱啱講嘅嘢雖然係事實，但聽完佢講之後，我個一刻對未來又真係有少少灰嘅感覺。

「你知唔知大年初一係咩日子？」阿康突然改變左話題。

「大年初一咪農曆新年囉，放假嘅日子囉！有咩嘢特別到你專登要講出嚟。」

「今年初一比較特別，個日係2月14日情人節。」阿康拎咗個小型掛曆俾我睇，然後指住2月14日。

「個日係2月14日咁又點？我當然知道個日係情人節，不過我同佢都唔係情人，唔會約佢出來慶祝情人節啦！」

「你試諗下，如果佢個日願意出嚟，你之後成功表白嘅機會高咗好多。」

「就算你講嘅係事實，但我個日約佢出嚟又可以做咩？同佢表白完之後同佢慶祝情人節？」

「唔一定要表白，但如果佢個日冇人約，其實都可以話確認佢真係單身囉！」

「不過你有要咁諗，嗰日年初一，就算佢冇人約，但屋企人要佢拜年，佢都係出唔到嚟，用出唔出到嚟去確認佢係唔係單身根本唔科學。」

「咁你可以當自己拜年悶得滯，然後搵下佢都可以㗎！」

「就算佢出到嚟，但你覺得我可以方便四圍走咩？新年條街人好多㗎，重要情人節更加令我唔想出街，就算真係出到去，肯定會有人望住我哋兩個。」其實阿康講完，我有諗過個日約唔約佢出嚟，但諗深一層如果情人節當日要我出去，面對路人好似睇動物園入面嘅動物眼光，我不如唔出去重好。

「你自己決定啦！宜家離2月14日重有兩個星期時間，有大把時間可以俾你慢慢諗。不過我作為你老死，好多時都睇唔過眼你拖泥帶水嘅性格，但性格唔係一時三刻可以改變得到，如果你需要人幫記得搵我。」

第五十七章

第五十七章

返到屋企，我有好好諗過阿康嘅提議，2月14日約Ashley出嚟。

但到時要做咩嘢，同埋洗唔洗準備禮物呢個問題，困擾左我一段時間。

拖延症發作嘅我，結果去到2月10先真真正正決定要點做。

關於禮物方面，我決定咗親手做一份禮物俾佢，最近嘅天氣都比較寒冷，所以我就諗住親手編織一條頸巾俾佢。

通常男生都是收到頸巾的人，而織頸巾應該是比較少有吧！

於是我同老媽子講，聽人講手織工藝對於復康有幫助，所以要求她教我織頸巾。

未學之前，本來我重以為織頸巾係一件十分困難嘅事情，但原來係一件好簡單嘅事，除咗偶然一兩次漏針的情況，我好快就上手。而且織頸巾並不需要用到太多的手部動作，並不會對手造成太大的負擔。

因為時間比較緊迫的關係，我織的頸巾不是用最幼的線，而是用較粗的線去織，初學者如果用幼線要花的时间會比較長，而且很容易出錯導致要重新再織的話，一定趕唔切2月14日送出。

終於時間去到2月13日當晚，屋企人食完飯之後就出左去行花市倒數完先返屋企。這是他們每一年的習慣，往年都會強迫我一齊陪佢哋出去。我最怕就係人頭湧湧，但老豆話熱熱鬧鬧咁先有新年的氣氛。

今年我行動不便的情況下，就直接叫兩位老人家好好享受一下二人世界。

我唔想出去最主要嘅原因，其實我重未織好條頸巾。

現在的時間喺9：30，我條頸巾而家去到埋尾嘅階段下，我估計用多幾個鐘頭就可以織好。

埋尾收針嘅步驟我會自己先嘗試一下，如果真係攞唔掂先叫老媽子出手相助。

一路織到唔記得咗時間，直到樓下傳嚟汽車嘅響啲，我先知道已經過咗十二點。

第五十八章

第五十八章

拎起手提電話，睇到嘅嘢阿康send過嚟嘅新年祝福訊息，我簡單回覆了一句祝福語句之後，陸續收到其他人俾我的訊息。

Adhley都係其中一個send短訊俾我嘅人。

「新年快樂，祝新一年身體健康，身體快點康復。」

「新年快樂，祝你學業進步，會考科科有A。」當我收到佢訊息之後，我突然想同佢傾偈，所以忍唔住打返電話俾佢。

「成你貴言，我啱啱同屋企人去咗維園行花市，你個邊環境咁安靜，睇你應該冇出去慶祝，做緊咩呀！」我諗就算佢唔聽我背景聲音，都應該估到我宜家如非必要下，都唔會想出街同人迫。

「你估中咗，我真係冇出到街，屋企兩老同你一樣出去行花市，得返我一個人獨留家中。我無聊之下都係睇下電視，冇咩嘢好做。見到你send訊息俾我咪諗住搵你傾下偈囉。」送頸巾俾佢係祕密進行嘅事，我當然冇可能呢一刻同佢講，我一直好努力織緊條頸巾諗住送俾佢。

「其實本身我都有諗住出去同人迫，但屋企人話想感受一下新年氣氛，所以我先陪佢出去倒數兼行花市。」

「不過點都估唔到咁快就一年了，感覺好似時間眨下眼就過咗去。」諗返起十月重新遇返佢，雖然只有短短半年時間，但我好似經歷咗唔少嘢。

「可能上一年太多事情發生咗，先會令你覺得時間過得太快，不過你當新一年新開始，唔好嘅嘢留返咗上一年，今年一定會有好多好事發生的。呢度有少少迫，我明天與你再聯絡吧！」

「咁好啦！明天再同你傾過。」講完之後，佢就收左我線。

其實如果我有發生意外，我都想同往年一樣，約朋友去行下花市，一大班朋友圍埋一齊新年倒數。而一理朋友當中有冇Ashley陪，呢一個就係個未知之數。

不過沒有意外的話，我諗在新年的時候，我未必可以同Ashley傾到呢一次電話。

我同佢嘅距離因為意外而拉近咗，我唔知呢啲算唔算因禍得福。

同Ashley傾完電話之後，又係時候開工繼續織條頸巾，今日情人節正日，約唔約佢呢個問題，都係留返織好條頸巾先再慢慢諗。

到最後，屋企兩老行完花市返到屋企都差唔多2：00鐘，而我都都啱啱去到收針的階段。而我有少少唔明個步驟，所以就請教我老媽子。

佢大概講解同指示我收針的步驟之後，我織嘅呢一條頸巾終於到大功告成。

第五十九章

第五十九章

幾經辛苦最終都算織好咗條頸巾，我將條頸巾小心翼翼咁摺好，然後放咗喺一個無印良物嘅紙袋入面。

臨馴之前，為咗安全起見，我將條頸巾由紙袋入面拎出嚟，再一次檢查，確認冇織錯同甩針嘅情況之後，先安心咁去馴覺。

屋企通常嘅習慣係初一同我老豆嗰邊親戚拜年，而每年到咗呢個時候，除咗逗利是個一刻係開心之後，基本上全程都要聽呢個親戚個女或者個仔考到好成績，邊個搵到份好工，呢種曬命嘅大會真係每年都好怕去。

今年破例老媽子唔洗我去拜年，我知道之後即時鬆咗口氣。

因為到時一定會提起我意外受傷嘅事，之後親戚們會講一堆鼓勵說話。我唔想煩同埋唔想成為親戚眼中嘅焦點，唔洗拜年對我嚟講係好事。

接近12:00的時候，我WhatsApp俾Ashley。

「你拜年逗左幾多封利是呀！」情人節呢個日子，雖然我好想約佢出街，交條頸巾俾佢，但無理由劈頭第一句就直接問佢出唔出嚟。我晚上諗咗成晚，先決定到用呢句做開場白。

「我宜家去緊第三個親戚屋企拜年，利是有十幾封都叫有大收獲嘅。你呢，收到幾封利是？」Ashley個訊息隔左幾分先回覆返我。

「我冇去拜年，老媽子應該會代我去逗利是。不過我親戚比較少，通常加埋都係得過十幾封左右，你宜家一日逗嘅利是隨時多過我嘅總和了。」

「得十幾咁少？我通常都會有四十封左右。」

「你就好啦！我想知你拜年唔覺得會好悶咩。同埋你拜年係唔係會拜全日，夜晚會唔會在親戚屋企食埋飯㗎？」如果佢唔需要拜成日嘅話，我應該會約佢出嚟。

「唔會悶呀！大部份親戚屋企，都有好多差唔多年紀嘅表兄妹一齊玩，一年先見一次我唔覺得會悶呀！我拜年通常都唔洗拜全日，同埋我唔會在親戚屋企食飯。」

睇個樣我應該有機會可以約到佢出街，送條頸巾俾佢。

「我在屋企悶到傻，我想去之前個間有得睇漫畫嘅cafe，你有冇興趣？」問完之後，我好緊張咁等佢嘅回覆。

「應該都冇咩問題嘅，反正呢個親戚係最後一個要去拜年嘅地方，本身我都諗住返屋企溫書。不過你開到聲話悶，咁大年初一我就當俾自己放一日假，溫少一日書對成績影響都唔會話太大。我就勉為其難陪下你啦！不過今日年初一，間cafe會唔會冇開門㗎？」

其實我本身都打定輸數，如果佢唔出嚟我都有個plant B交條頸巾俾佢，但冇諗過竟然可以約到佢出嚟。

「我本身諗住就算你唔出嚟，我都會去個間Cafe睇漫畫，所以我打咗電話問咗間Cafe，佢哋話下晝會開工。」

「咁好啦！我一陣走得打電話俾你，我諗3：00左右就走得，咁約定在咩地方等？」

「大年初一旺角一定好多人，我會直接上間Cafe，順便拎咗位先，到時Cafe見啦！」其實我係驚在街上俾條頸巾俾佢，會俾街上嘅其他人用奇異嘅目光睇我。

「你一個人出去真係冇問題？」

「冇問題啦！我出院之後日日都有好似老人家一樣，一個人在樓下公園行當復康訓練，所以唔洗擔心我。」

「你既然咁講，你自己小心，一陣見啦！」

「ByeBye」

臨出門之前，我檢查咗銀包睇下有冇足夠嘅錢，同埋最重要嘅頸巾就出門，希望一陣所有嘢都順順利利。

第六十章

第六十章

因為屋企本身靠近火車站嘅關係，所以我最後都係決定搭火車出旺角。

出到去大概時間係下午1：30左右，出入火車站嘅通常都係一家大細為主，可能因為都要拜年嘅關係，暫時仲未見到太多情侶一雙一對咁出現。

火車站同呢間Cafe距離話遠唔遠話近唔近，我最後決定都係坐的士去嗰邊。

為咗避免今日有機會太多人去Cafe嘅關係，所以我出門之前就打電話去Book位先。

唔知係呢間Cafe啱啱開門冇幾耐，定還是新年個個都要去拜年嘅關係。顧客除咗我之外，就只有一枱4個男仔約出嚟打機。而之前我同Ashley坐個張梳化就冇人選擇，所以我同侍應講咗要坐返同一個位。

宜家坐返喺呢個梳化嘅位置，就好似時間倒流返去我第一次同Ashley約會嘅情況。

佢當日有急事突然離開後，我同佢都冇再踏足過呢間Cafe。

所以今日我約返佢返呢間Cafe，就係諗住當作嗰一日約會嘅延續。

我行出去書架，再次拎返之前佢借嘅<<華麗咖喱食桌>>第1-10期返埋個位度。

宜家時間尚早，所以我決定一邊睇漫畫，一邊等佢一陣嚟到。

當我睇到漫畫第四期嘅時候電話響起。

「我可以走！！Cafe嗰邊多唔多人呀？」Ashley把聲聽落好似好開心。

「暫時人唔算太多，得我一個人再加埋同埋有幾個男仔坐咗一台喺度打緊 Monster Hunter。」

「啱曬你啦！你都有打㗎嘛！我未到之前你可以過去同佢哋組隊。」

「我冇帶部機出嚟！同埋佢哋四個人啱啱好齊人，唔好拆開人哋啦！你聽落把聲好似好興奮，到底有咩高興嘢發生呀？」

「我有個表姐玩開塔羅牌，佢啱啱同我占卜完個結果唔錯，所以我咪開心囉！」

「咁佢同你占卜咗啲咩嘢？」

「無可奉告，我係唔會話畀你聽。」

「車~~懶神秘，你預計幾點會嚟到？」

「我宜家喺觀塘親戚屋企出發，我諗一個鐘頭內點都會到。」

「咁OK啦！我在Cafe慢慢睇住漫畫等你過來，你到咗直接上Cafe就可以了。」

「OK，咁一陣見。拜拜！」

「好，一陣見。拜拜」

其實講真，我真係好想知道佢占卜咗咩嘢，但係佢唔肯講嘅話我迫佢都冇用。

當知道仲有半個鐘頭就可以見到佢，我就覺得好緊張，我唔知道佢見到條頸巾之後會有咩反應。

我不斷喺個腦入面練習習送頸巾嘅對白，幻想緊當佢收到頸巾之後同佢嘅表情。

雖然我已經練到滾瓜爛熟，但我覺得自己到最後真正講出口嘅時候，好可能變咗個腦一片空白咩都諗唔到。

第六十一章

第六十一章

過咗唔知幾耐，電話又再次響起，係Ashley打電話俾我。

「喂！做咩事打俾我嘅」明明一陣就會見面，我好好奇佢做咩要特登打電話俾我。

「我啱啱旺角落咗車，但我醒唔起嗰間Cafe叫咩名同埋地址，所以打電話嚟想問你。」

「Sorry，我一直以為你記得，所以冇俾返個地址俾你，你朝早做咩唔問我嘅。」

原來Ashley唔記得咗呢間Cafe嘅名同地址，個一刻我有少少唔開心。但諗深一層，間Cafe係我帶佢過嚟，加上Ashley可能唔覺得呢間Cafe係第一次同我約會嘅場地，所以對呢間Cafe冇深刻回憶都好正常。

「係我唔好意思先真，我本身都諗住自己會記得，但出咗閘就諗極都諗唔起間Cafe嘅地址同埋個名。」

「唔緊要啦！我其實都有責任要一開始講個地址俾你知，你等我一陣，我WhatsApp返間Cafe嘅地址俾你。」

「好，唔該曬你。」講完之後Ashley就收線。

收咗線之後我問侍應拎咗cafe地址，然後WhatsApp返個地址俾佢。

隔咗三個字左右，佢終於喺cafe門口出現。

可能係因為新年嘅關係，佢著返第一次嚟cafe個一件長袖紅色格仔恤衫。

見到佢出現喺大門口之後，我揮手叫佢埋嚟。

佢行埋去梳化側邊，正想將個斜揸袋放低嘅時候，佢眼利咁第一眼就見到我放喺梳化上面嘅無印良品紙袋。

「你上嚟之前去左無印良品？」

我無諗過佢劈頭第一句，就問我關於個紙袋嘅問題，攞到我之前預先彩排的對白，變到完全冇用。

「唔係呀！我冇去到無印良品，我對朗豪坊條扶手電梯有恐懼，點會單獨一個人走上去無印啫。我只係見到屋企有個紙袋咪借住先，用佢嚟裝住啲嘢啫。」

「咁你裝住嘅係咩嘢？」

Ashley坐喺我側邊，然後偷偷咁想睇下個紙袋入面裝住嘅係咩嘢。

「既然你咁想知，咁我攤出嚟俾你望一望呀！」於是我從個紙袋拎咗我織條頸巾出嚟。

「邊個織條頸巾俾你，攞到你咁珍而重之咁放落個紙袋度，重要唔捨得戴上身。」
就咁聽佢把聲，同埋睇咗佢個表情，感覺上佢好似有少少不滿。我完全估唔到佢語氣竟然一秒就轉變咗。

我點都估唔到，條頸巾都未正式送俾佢，佢就誤會咗我，宜家重好似激鬪咗佢。

「我朝早約完你就立即出嚟，點會有可能有時間去約其他女仔，同埋除咗你之外，我都冇女仔嘅朋友，又點有可能會有女仔送頸巾俾我。」俾佢問嘅語氣嚇親之後，我儘量去解釋條頸巾唔係其他女仔送俾我。

「我都冇講過條頸巾係女仔送，你做咩咁緊張講話唔係女仔送，咁你講我知點解你要摺得咁整齊。」

當下我反駁嘅能力完全hang機咗幾秒，好似感覺上係越描越黑，但我冇理由令到誤會再加深，所以我唔再理之前諗好嘅對白，直接講出條頸巾係送俾佢呢個嘅重點。

「其實條頸巾係我織俾你，因為係我第一次織，我好驚會唔小心整爛佢，所以先咁樣小心好好保管住佢。」講完之後我直接將條頸巾交到佢手上。

「送俾我？點解送俾我嘅！同埋真係你親手織㗎？」Ashley接過條頸巾，面上流露出難以置信嘅表情，語氣都好似溫和咗好多。佢攤開條頸巾在梳化上面再對摺一半，然後好似驗貨咁前揭後揭咁去檢查我送俾佢嘅呢條頸巾。

「單純係手部復康訓練做得悶，所以先想轉個形式去訓練返自己。最重要嘅係我見你平時都好似著好少衫，驚你會凍親先會諗住順手織條頸巾俾你。」我講嘅其實都有一半係事實，但我最主要都係想送份情人節禮物俾佢，雖然我同佢之間並唔係情侶關係。

「我想問下，呢條頸巾你織咗幾耐？」佢終於檢查完條頸巾，然後一面不停用手去磨擦條頸巾一面同我講嘢。

「我10號開始織，織到啱啱尋晚就埋到尾，所以織咗3日左右啦！」

「初學者嚟講三日起到貨其實都算織得快，我啱啱檢查過都有話出現漏針嘅情況，呢條頸巾你真係可以送俾我？」講完之後佢就企起身將我織嘅頸巾戴上條頸，佢戴上身之後我先發現頸巾嘅長度好似有少少偏長，因為我織嘅時候係用我嘅身高去量度，唔記得咗佢比我矮得多，我冇諗過用佢嘅身高去量度，我覺得自己真係好大意。

「條頸巾我真係送俾你，但係個長度係唔係長咗少少？」當我見到條頸巾好似長得滯差少少就會拖地，我真係有啲驚佢唔鐘意條頸巾。

「唔會呀，我覺得啱啱好。好多謝你送條頸巾俾我。」
聽到佢咁樣講之後，我即刻鬆咗口氣。

「你鐘意就好啦！不過宜家呢度咁暖，應該唔洗戴住條頸巾住你不如除低佢先。」

「都好，今日出面比較凍，呢條頸巾可以一陣用。」講完之後Ashley將條頸巾除低放返入去無印良

品的紙袋入面。
然後坐低睇mean點餐。

第六十二章

第六十二章

呢一次，Ashley最後冇再中途走咗去，我哋喺cafe逗留咗好長時間。

唔知道係唔係一早起身拜年嘅關係，佢睇睇下漫畫馴著咗。

張梳化唔大，所以我同佢嘅距離好近，佢馴著嘅時候，挨咗落我膊頭度。

佢挨住我膊頭嘅時候，我全身都僵硬曬，雖然平時我同佢都有身體接觸，但個種接觸只係單純地我行嘅時候佢扶一扶住我。

就算之前呢間cafe坐，我都只係膊頭貼住膊頭咁坐，宜家佢個頭挨住我膊頭嘅身體距離，接近頭貼住頭呢個距離，係我認識佢咁耐嘅第一次。

自從我入院到呢個時候，佢經常過嚟探病同時又要返學應付即將來臨嘅會考，我有諗過到底佢有冇好好休息過。

所以佢呢一刻挨住我膊頭馴著，我都儘量唔想騷擾到佢嘅休息。

我諗宜家應該係佢呢幾個月嚟最放鬆嘅時間，所以我都靜靜咁坐喺度陪住佢。

「我啱啱馴咗幾耐？」馴咗一段時間之後，佢馴醒第一句就問我呢個問題。

「大概兩個鐘頭左右，不過你可以繼續馴都得。」

「兩個鐘頭咁耐，你做咩唔叫醒我？我突然間好眼馴先會馴著咗。挨住咗你膊頭馴咗咁耐，有冇覺得唔舒服，你抬下隻手睇下會唔會好痺？」佢講完之後，一定要我做抬高隻手嘅動作。

「冇事，我隻手冇痺到。」我抬起隻左手俾佢睇，證明我隻手好正常冇因為佢壓住而麻痺。

「如果唔舒服記得話我知，唔好死頂。」雖然我抬起隻手證明我真係冇事，但佢都好似唔多信，然後幫手按摩啱啱俾佢挨住嘅左面膊頭同埋隻手。

「我冇死頂呀！反而你真係劫嘅話，洗唔洗早啲返屋企休息一下。」雖然我好想再同佢一齊多一陣，但我見到佢咁劫，又唔忍心要佢陪我，宜家我嘅心情極度矛盾。

「啱啱馴醒我宜家好精神，同埋冇理由你叫我出嚟，然後我馴咗兩個鐘就返屋企。」

「你咁劫我都重要迫你陪我，勉強你我其實唔會開心。其實時間都唔早，我都想返屋企休息，不如埋單好唔好。」

講真，條頸巾送出，我都算完成任務。呢兩個鐘頭佢挨住我膊頭咁馴，我其實覺得心滿意足，我真心想佢好好休息一下。

「我其實冇勉強，宜家真係精神好多，不過你如果覺得叻的話，咁埋單啦！」

講完之後，Ashley叫左侍應埋單，本身我諗住埋單嘅，但係Ashley堅持話收到我條頸巾做禮物，唔應該再請佢，所以就一手搶咗張單由佢埋單。

埋完單我同佢離開cafe，然後走去地鐵站準備搭車離開。

第六十三章

第六十三章

宜家重未到食飯時間嘅關係，車廂人流唔算太多，雖然冇位坐但打廂入面都唔算太過擠迫，我總算有個位可以企一下。

為左避免阻礙到其他乘客上落車，所以我選擇左近車廂門口有扶手的位置挨好。

我企左一陣間，有一個年輕媽媽見到我拎住拐仗好似企得好辛苦，就同佢幾歲大嘅囡囡講話要讓座俾我。

其實我想聽從醫生指示，訓練下自己身體平衡從而加快康復進度。再加上我搭去九龍塘其實都只係搭多兩三個站就落車，所以我拒絕左呢位媽媽嘅好意。

見到我拒絕坐低之後，Ashley決定左同我一齊在車廂門呢個位置“罰企”。

我企嘅呢個位置剛剛好有扶手形成左一個凹入去嘅位置，所以Ashley同我平排好擠迫咁企埋一齊。

唔知道係車廂空氣不足定還是Ashley真係太過劫嘅關係，佢上車冇耐就有再同我傾偈，然後佢經過石硤尾站嘅時候，竟然企喺度挨住座椅玻璃屏風馴著左。

在下一個站就到九龍塘需要轉車嘅情況之下，我雖然想叫醒佢唔好馴覺要落車，但我見到佢咁劫都專登出嚟陪左我幾個鐘頭的情況之下，就算好快就到九龍塘站，我最後都係唔忍心叫醒佢。

不過企喺度馴覺呢一個情況，如果列車緊急剎車的話，她隨時有機會失去平衡跌倒，所以我不再與她平排而企，我輕輕移動了自己的位置擋在她的面前，然後握住扶手站好。

當列車就快來到觀塘站的時候，車廂突如其來的劇烈搖晃下，為避免她失平衡跌倒，我不自覺咁大力攬住左佢。

可能因為差啲失平衡加上我一下大力攬住佢嘅關係，Ashley喺睡夢之中清醒過來。

未知她是怕失平衡撞倒我還是其他的原因，她下意識咁攬返住我。隔左一秒時間，她與我同時鬆手，突如其來的身體緊密接觸的情況之下，我彷彿感受到我同佢兩個人嘅心跳聲。

「我哋宜家去緊邊個站？」當Ashley回復清醒，劈頭第一句就問我呢個問題。

「下一個站觀塘站。」

「冇理由，啱唔係石硤尾站咩？做咩突然之間下個站就到觀塘。」照呢個情況睇，佢應該意識唔到自己企喺度馴著左一段時間，所以唔明白點解過左石硤尾站合理隻眼一陣之後，擘大眼一下就跳過左中途一大堆站去到觀塘。

「你過左石硤尾站冇耐之後，就企喺度馴著左，所以咪由石硤尾站一下就跳到觀塘站。」

「Sorry，乜我原來瞓著左咁耐，咁一陣觀塘站落車我同你搭返對頭車返去九龍塘啦！」對於自己瞓過龍導致我有係九龍塘轉車，佢明顯有少少內疚。

「唔洗咁麻煩啦

，我其實在觀塘站有巴士可以搭返屋企。你反正都住附近，我見你其實都好劫，不如你一陣陪我等完車之後，返屋企好好休息重好啦！」

見到佢咁劫，我其實唔忍心要佢陪我再搭返九龍塘然後先再返自己屋企。

「咁好啦！我送埋你去巴士站，當你上車之後，就會返屋企抖下。」

講完之後，列車剛好埋站，然後我就同佢一齊落車行去巴士站等車。